

ରସିକ ମତରସବୃତ୍ତି ଶ୍ରୀରାମା

ରସିକ-ପାରିଚିତ୍ତି

রবীন্দ্রস্মৃতি

শ্রীইন্দিরা দেবী চৌধুরানী



বিশ্বভারতী গ্রন্থালয়

২ বঙ্কিমচন্দ্র চট্টোপাধ্যায় স্ট্রীট । কলিকাতা ১২

প্রকাশ ২৫ বৈশাখ ১৩৬৭

প্রকাশক শ্রীপুলিনবিহারী সেন
বিশ্বভারতী । ৬/৩ দ্বারকানাথ ঠাকুর লেন । কলিকাতা
মুদ্রাকর শ্রীমূৰ্খনারায়ণ ভট্টাচার্য
তাপসী প্রেস । ৩০ কর্নওয়ালিস স্ট্রীট । কলিকাতা

পূজনীয় কবিগুরু রবীন্দ্রনাথের শতবার্ষিকী উপলক্ষ্যে তাঁর পুণ্যস্মৃতির প্রতি
বিনীত শ্রদ্ধাঞ্জলি নিবেদন করবার উদ্দেশ্যে এই স্মৃতিকথা রচিত। শ্রীযুক্ত
সত্যেন্দ্রনাথ বসু মহাশয়ের সোৎসাহ প্ররোচনায় এর উৎপত্তি ও কল্যাণীয়
শ্রীমান শুভময় ঘোষের সযত্ন অঙ্কলিখনে এর পরিসমাপ্তি। প্রায় পৌনে শতাব্দীর
স্মৃতির জটিল জালকে সংগীতস্মৃতি নাট্যস্মৃতি সাহিত্যস্মৃতি প্রভৃতি কয়েকটি
অধ্যায়ে ভাগ করেছি।

শ্রীইন্দিরা দেবী চৌধুরানী

সূচীপত্র

সূচনা	১১
সংগীতস্বৃতি	১৫
নাট্যস্বৃতি	২৭
সাহিত্যস্বৃতি	৪৩
ভ্রমণস্বৃতি	৫৪
পারিবারিক স্বৃতি	৫৮

রবীন্দ্রস্মৃতি

সূচনা

কোনো মহাপুরুষকে বাইরের লোকে যে ভাবে দেখে বা তাঁর প্রতিভার যে পরিমাণ পরিচয় পায়, ঘরের লোকের দৃষ্টিভঙ্গি ঠিক সে রকম নয়। তারা বেশি কাছ থেকে দেখে বলে যেমন তাঁর ব্যাপক বা সমগ্র ব্যক্তিত্বের অনুধাবন করতে পারে না, তেমনি অনেক ছোটখাটো ইঙ্গিত জানতে পায় যা বাইরের লোকের অধিগম্য নয়। আত্মীয়মাত্রেয়ই যে এই সৌভাগ্য ঘটে তা নয়, তবে নানা ঘটনাচক্রে আমরা বহুদিন ধরে তাঁর নিকটসামিধ্য এবং ঘনিষ্ঠ পরিচয় পাবার সুযোগ পেয়েছিলুম। সেই ছোটখাটো পরিচয়খণ্ডগুলি একত্র করে এই স্মৃতিপটে সাজিয়ে দেবার চেষ্টা করেছি। আমার এই ক্ষুদ্র প্রচেষ্টা বিষয়গুলোই ভবিষ্যৎ পাঠকের পক্ষে চিত্তাকর্ষক হবে বলে আশা করি। তাঁকে যারা দেখেন নি তাঁর নানা বয়সের ছবির দ্বারা সে অভাব কতকটা পূরণ করা হয়েছে, আর তাঁকে যারা জানেন নি তাঁরা এই ছোটখাটো বর্ণনাগুলি একত্র করে তাঁর প্রকৃতিরও আংশিক একটি ছবি বোধ হয় মনশ্চক্ষে গড়ে তুলতে পারবেন। এইরকম অনেকগুলি ভিন্ন ভিন্ন দৃষ্টিভঙ্গির সমন্বয়েই ব্যক্তিত্ব-নামক দুজ্জ্বল পদার্থের কিঞ্চিৎ আভাস পাওয়া যেতে পারে। যদিও বিরাট ব্যক্তিত্বকে স্পষ্টভাবে ধরতে-ছুঁতে পারা সহজ কাজ নয় এবং আমার মত মনস্তত্ত্ব-অনভিজ্ঞ লোকের পক্ষে প্রায় অসম্ভব। অতি সাধারণ ব্যক্তিকে যখন অতি কাছে থেকে দেখেও বোঝা শক্ত মনে হয় তখন অসাধারণ ব্যক্তিত্বকে ফুটিয়ে তোলা অনেক দূরের কথা—পঙ্গুর গিরিলজ্যেনের মত। একই ব্যক্তির মধ্যে অনেক ব্যক্তি বাস করে, এ কথাটা কে বলেছেন ঠিক মনে পড়ছে না। কিন্তু আমাদের অভিজ্ঞতার সঙ্গে মেলে না এমন বলতে পারি নে।

আমাদের স্তরের মধ্যে প্রচলিত স্নেহ দয়া মায়ামমতা অনুরাগ বিরাগ শোক আনন্দ প্রভৃতি মনোভাবগুলি যেভাবে প্রকাশ পায় তাতেই আমরা অভ্যস্ত, স্বতরাং, অপর কোনো ব্যক্তিতে যদি সেই প্রকাশের ব্যতিক্রম দেখি তখন মনে হয় সে বেদনাবোধই বোধ হয় তাঁর নেই। রবিকাকা সাধারণভাবে শোকপ্রকাশ করতেন না বলে তাঁর ব্যক্তিগত বেদনাবোধ কম ছিল,

এ কথা কেউ কেউ মনে করতেন শুনেছি। কিন্তু আগেই বলেছি আমি মনস্তত্ত্ব-বিশ্লেষণে অভিজ্ঞ নই; স্মৃতির বিচার করতেও সক্ষম নই। কবি নিজের বলেছেন—‘আপন মন যদি বুঝিতে পারি, পরের মন বোঝে কে কবে’। তিনি নিজের সব কথাই নিজের বলে গেছেন, আমাদের বলবার কিছু বাকি রাখেন নি। মনে আছে, মা ঠাট্টা করে আমার বাপখুড়োদের সম্বন্ধে বলতেন যে, তাঁরা নিজের জীবনের কথা সবই লিখে গেছেন, আর অতের কিছু লেখবার দরকার নেই।

আমার নিজের ধারণা এই যে, সাধারণে ও অসাধারণে যেমন প্রভেদও আছে তেমনি কিছু-না-কিছু যোগসূত্রও আছে, নইলে আমরা তাঁদের মহত্বও বুঝতে পারতুম না। আমার অনেক সময় মনে হয়েছে যে, আমরা ক্ষণিকের জ্ঞান যে উচ্চস্তরে উঠে আবার শীঘ্রই অভ্যস্ত সমভূমিতে নেমে যাই; তাঁরা জীবনের বেশির ভাগ সময়েই সেই উচ্চস্তরে বাস করেন। এই হচ্ছে তাঁদের সঙ্গে আমাদের প্রধান তফাত। যেমন ধূপধুনোপত্রপুষ্পশোভিত সংগীতযন্ত্রে ধ্বনিত সৌন্দর্য ও গান্ধীর্থ-পূর্ণ মন্দিরে যতক্ষণ থাকি ততক্ষণ একটি অতীন্দ্রিয় ভাবরাজ্যে বিচরণ করি, কিন্তু সেখান থেকে নিত্যনিয়মিত আবেষ্টনে ফিরে এলেই আবার তেল-রুন-লকড়ির চিস্তার মধ্যেই বেশ আরামে গুছিয়ে বসে যাই। আরাম কথাটি থেকে মনে হল যে, আমরা যে সাধারণ স্তরের আবেষ্টনকে আরাম বলে মনে করি, মহাপুরুষদের পক্ষে তেমনি হয়তো সেই উচ্চস্তরই আরামদায়ক, যেখানে পৌছে মহর্ষি বলেছেন—

তিনি আমার প্রাণের আরাম,

মনের আনন্দ, আত্মার শান্তি।

এই অবস্থাকে বলা যেতে পারে উচ্চতম স্তর, কিন্তু তবু আমরা কখনোই অস্বীকার করতে পারব না যে, রবিকাকার মনের অনেক অত্যাশ্চর্য স্তরের মধ্যে একটি স্নেহ-মমতা-প্ৰীতির স্তরও ছিল যার অজস্রধারা আমরা শিশুকালাবধি উপভোগ করেছি। তাঁর পরবর্তী জীবনের সঙ্গীরাও এর সাক্ষ্য দিতে পারবেন। মনোভাব প্রকাশের অনেক উপায়ই তিনি অবলম্বন করেছেন, যেমন, কবিতা, গান চিঠিপত্র ও তাঁর দীর্ঘজীবনের অসংখ্য গল্পগুচ্ছ-রচনাবলী এবং কর্মধারা। এই সামান্য স্মৃতিরেখায় তাঁর বিরাট ব্যক্তিত্বের পূর্ণ পরিচয় দেওয়া আমার উদ্দেশ্য ও ক্ষমতা ছুঁয়নি বহির্ভূত। তবে, আমার নিজস্ব কচি প্রকাশ করাও

হয়তো দোষের হবে না ; কারণ, বিপুল পৃথিবীর মধ্যে সমমতি সমানধর্ম লোক অবশ্যই মিলবে। শৈশবে-যৌবনে তাঁর কবিপ্রতিভার ছায়ায় মাহুষ হয়ে আমাদের এইটুকু লাভ বা লোকসান হয়েছে যে, তাঁর উত্তরকালের কোনো কবিতাই তেমন বিশ্বয় বা আনন্দের উদ্রেক করে না। এমনকি যখন থেকে তাঁর সঙ্গে আমার ঘনিষ্ঠ যোগ ছিন্ন হয়েছে, সেই বিংশ শতাব্দীর স্মৃচনার পরে রচিত তাঁর বহু কবিতাই আমার কাছে অপরিচিত মনে হয়—সেটি অবশ্য আমারই দুর্ভাগ্য। স্বর তাল ভাব যেমন গানের অবিচ্ছিন্ন অঙ্গ, তেমনি ছন্দ এবং মিল যদি কবিতার অবিচ্ছেদ্য অঙ্গ বলে গণ্য হয়, তবে তাঁর কবিতা যে অপূর্ব ছন্দের বৈচিত্র্য আর অনবগত মিলের সৌন্দর্যে ঐশ্বর্যশালী সে অন্তত আমার বিবেচনায় অগ্রত অতীব দুর্লভ।

আমাদের পরবর্তীকালে নিজ নিজ অভিজ্ঞতানুসারে নানা জনে রবীন্দ্রনাথের নানা ছবি আঁকতে চেষ্টা করেছেন। যেমন—শচীন্দ্রনাথ অধিকারী, সীতা দেবী, মৈত্রেয়ী দেবী, প্রতিমা দেবী, রানী চন্দ, রানী মহলানবীশ, সৌম্যেন্দ্রনাথ ঠাকুর প্রভৃতি। তবে, আর যতই হুবিধা থাকুক, বয়সে কেউ আমার সমকক্ষতার দাবি করতে পারবেন না এটুকু আশা করতে পারি।

কেবলমাত্র বই পড়ার পরিচয় আর প্রত্যক্ষদর্শীর পরিচয়ে অনেক তফাত। যদিও আমার প্রাচীন বয়সের দরুন স্মৃতি অনেকটা ঝাপসা হয়ে এসেছে, তাতে তথ্যের কোনো দিকে কমিবেশি যদি বা হয়, সত্য মনের ভিতরে আজও উজ্জল হয়ে রয়েছে—এ দাবি তো করতে পারি।

বিংশ শতাব্দীর আরম্ভেই যেমন ব্রহ্মচর্যাশ্রম স্থাপন রবিকাকার জীবনের একটি বিশিষ্ট পর্বের স্মৃচনা করে তেমনি দ্বিতীয় দশকের পরে বিশ্বভারতী পত্তনেও তাঁর জীবন একটা নতুন মোড় ফেরে, সেখান থেকে ক্রমশ আমাদের যাত্রাপথ ভিন্ন হয়ে যায়। তবু ডালপালা যতই দূরে দূরে ছড়িয়ে পড়ুক-না কেন, গাছের মূলকাণ্ড তার আদি প্রতিষ্ঠাভূমিতেই থেকে যায়। এই স্মৃচ্রে বাবা বিলেত যাবার সময় যে গানটি লিখেছিলেন তার শেষ কথাটি দিয়ে শেষ করি—

দিবস ফুরায় যত

ছায়া যায় দূরে তত

কভু না ছাড়ায় তবু পাদপবন্ধন।

সংগীতস্মৃতি

ছেলেবেলা থেকেই আমরা গানবাজনার আবহাওয়াতে মানুষ— দেশী বিলিতি ছু রকমেরই। ঠাকুর-বংশে দেখতে পাই পুরুষানুক্রমে এই দুই ধারাই অল্প-বিস্তর চলে আসছে। যারা বাংলাদেশের সেকালের সংগীত-ইতিহাসের খোজ রাখেন তাঁদের এই সূত্রে স্বভাবতই পাথুরেঘাটার শৌরীন্দ্রমোহন ঠাকুরের নাম মনে পড়বে। তাঁর ছেলে প্রমোদকুমার ঠাকুরের রচিত কতকগুলি বিলিতি স্বরলিপিতে লিখিত ও বিলিতি স্বরসন্ধিযুক্ত (harmony) দেশী রাগ-রাগিণীর ছোট গং আমার কাছে এখনও আছে। শৌরীন্দ্রমোহন বা ছোট-রাজার গুরুদাস নামে এক নাতিও সেকালের কলকাতার রঙ্গমঞ্চে কোনো বৈদিক স্তোত্রের স্বরসন্ধি করে গান গাওয়াবার পরীক্ষা করেছিলেন।

আমার বিলিতি সংগীত-প্রীতি অবশ্য লরেটো কন্ভেন্টের শিক্ষাজনিত। সেখানে সেন্ট পল্‌স্ ক্যাথিড্রালের অর্গানিস্ট্ মি. স্লেটারের কাছে পিয়ানো, এবং মান্‌জাটো নামক এক ইতালীয় বেহালা-শিক্ষকের কাছে বেহালা শেখবার আমার সৌভাগ্য হয়েছিল। তখনকার কালে কেম্‌ব্রিজের ট্রিনিটি কলেজ অব্ মিউজিক থেকে গানের ঔপপত্তিক প্রশ্ন এ দেশে পাঠানো হত। তার ইন্টারমিডিয়েট পর্ব পর্যন্ত আমি পাস করেছিলুম।

রবীন্দ্রস্মৃতির কথা বলতে গিয়ে প্রথমেই বিলিতি সংগীতের প্রসঙ্গ উত্থাপন করা যতটা আশ্চর্য মনে হতে পারে বস্তুত তা নয়; কারণ তাঁর সঙ্গে প্রকৃত-পক্ষে সজ্ঞানে আমাদের ভাইবোনের প্রথম পরিচয় হয় বিলাতপ্রবাসে। সেখানে আমরা মায়ের সঙ্গে অনুমান ১৮৭৭ খৃষ্টাব্দে গিয়ে পৌঁছই, পরে বাবা ও রবিকাকা ১৮৭৮ খৃষ্টাব্দে আসেন। সেই সময় থেকেই বিলিতি সংগীতের সঙ্গে তাঁর পরিচয় হয়, এবং শুনেছি তাঁর স্বরেলা জোরালো তারসপ্তকের চড়া গলা, যাকে ও দেশে বলে ‘টেনর্’, শুনে ওরা মুগ্ধ হত। সে বয়সে অবশ্য এর সম্পূর্ণ রসগ্রহণ করবার ক্ষমতা আমার ছিল না, কিন্তু এটুকু মনে আছে যে,

‘Won’t you tell me, Molly darling’

‘Darling, you are growing old’

‘Good-bye, sweetheart, good-bye’

প্রভৃতি তখনকার জনপ্রিয় গানগুলি তিনি গাইতেন। আইরিশ কবি টমাস মুরের Irish Melodies তখন খুব লোকপ্রিয় হয়েছিল। তার মধ্যে ‘The Last Rose of Summer’ নামে একটি গান আমি ফিরতি-বেলায় জাহাজের কাপ্তেনকে গেয়ে শুনিয়েছিলুম, একটু একটু মনে পড়ে।

রবিকাকা দেশে ফিরে আসার অনতিকাল পরেই কালমুগয়া গীতিনাটিকা রচনা করেন। তাতে আর বাস্তবিকপ্রতিভাতে কতকগুলি গানের সুরে তাই বিলেতপ্রবাসের প্রভাব লক্ষিত হয়। কতকগুলি গানে ধূয়া বা কোরাসের প্রবর্তনকে বিলিভী গানের পরোক্ষ প্রভাব বলা যেতে পারে। যেমন ‘জনগণমন-অধিনায়কে’র “জয় হে জয় হে”, ‘মাতৃমন্দির পুণ্য অঙ্গনে’র “জয় জয় নরোত্তম পুরুষসত্তম”, ‘ভালোবেসে যদি স্থখ নাহি’র “তবে কেন তবে কেন” অংশ, ‘মম যৌবন-নিকুঞ্জে’র “সখি জাগো জাগো জাগো”, আর ‘যদি তোর ডাক শুনে কেউ না আসে’র “একলা চল রে”। বাবার ‘মিলে সব ভারতসন্তান’ গানে “হোক ভারতের জয়” ইত্যাদি যে ধূয়া আছে, জানি নে, রবিকাকা তার দ্বারা প্রভাবান্বিত হয়েছিলেন কি না।

পরবর্তী জীবনে আমি অবশ্য রবিকাকার অনেক বিলিভী গানের সঙ্গে পিয়ানো বাজিয়েছি, সেসব এখনও সেদিনের মুক সাক্ষী-স্বরূপ আমার গানের বাঁধানো বইয়ে পড়ে আছে, যথা, ‘In the gloaming’, ‘Then you’ll remember me,’ ‘Good night, good night, beloved’, সুইনবার্নের ‘If’ ইত্যাদি। এ ছাড়া বেন্ জন্সনের বিখ্যাত গান ‘Drink to me only with thine eyes’ ভেঙে লিখেছিলেন ‘কতবার ভেবেছিছ’। প্রসঙ্গক্রমে অনেক বছর ডিঙিয়ে এখানে বলছি যে, সম্প্রতি ১৯৫৬ সালে বহুকাল পর বাকে-দম্পতি শান্তিনিকেতনে এলে আমি তাঁদের এই ভাঙা গানের কথা বলি। বাকে সাহেব আমাকে দিয়ে গানটি গাইয়ে তৎক্ষণাৎ টেপ্ রেকর্ডারে তুলে নিলেন। আর একটি গান, রোমান ক্যাথলিকদের বিখ্যাত স্তব ‘আভে মারিয়া’ রবিকাকা পিয়ানো ও বেহালার যুগল সংগতে গাইতেন, সেটি আমার বড় ভালো লাগত। ইদানীং কত চেষ্টা করেছি এই বেহালা-সংযুক্ত গানটির স্বরলিপি সংগ্রহ করতে, কিন্তু এখনও কৃতকার্য হই নি। তবুও আশা ছাড়ি নি। ওদের

সংগতের বিশেষত্ব এই যে, তা আমাদের মত কেবল মূল সুরকে অনুসরণ করে না, কিন্তু ভিন্ন পথে চলেও সংযোগ রক্ষা করে, তাতে একটি অতিরিক্ত মাধুর্যের সঞ্চার হয়। আমি অবশ্য উক্ত সংগীতরসে বঞ্চিত শ্রোতাদের কথা বলছি নে, কারণ তাঁদের কানে এটা বেশুয়া লাগতে পারে— সে রকম মস্তব্যও আমি শুনেছি। এখানে অবাস্তর হলেও বলবার লোভ সংবরণ করতে পারছি নে যে, আমাদের যন্ত্রসংগীতে এই নিয়ে পরীক্ষা করবার বিস্তীর্ণ ক্ষেত্র পড়ে আছে। কোনো একটি গং বহু শ্রোতার ঞ্চতিগোচর করতে হলে কেবলমাত্র যন্ত্রের সংখ্যা বাড়ানো বই অল্প কোনো বৈচিত্র্য সাধনের চেষ্টা আমাদের মধ্যে অনেকদিন পর্যন্ত হয় নি। এখন অবশ্য শুনতে পাই সিনেমা রঙ্গমঞ্চ ও বেতারে যন্ত্রসংগীতে নানা প্রকার ধ্বনিবৈচিত্র্য-সম্পাদনের চেষ্টা করা হয়, কিন্তু সব সময় সেগুলি খুব ঞ্চতিমধুর ও শাস্ত্রসম্মত হয় কি না সন্দেহ।

আমার অনেক সময় আশ্চর্য বোধ হয় যে, রবিকাকা কখনো কোনো যন্ত্র বাজানোর দিকে মনোযোগ করেন নি। যদিও পিয়ানোয় বসে বসে এক আঙুল দিয়ে ঠুকে গানে সুর বসানোর চেষ্টার কথা মনে পড়ে। তবে তিনি সব-কিছু নতুন ও সুন্দর জিনিসকে সমাদর করতে সর্বদাই প্রস্তুত ছিলেন। আমি অল্প কোথাও লিখেছি যে, তিনি তাঁর পরিবারের ছেলেমেয়েদের এ বিষয়ে অপটু প্রচেষ্টাকেও কোনোদিন নিন্দাসাহ করেন নি। মনে আছে, আমাকে, আমার দাদা সুরেনকে আর সরলাদিদিকে রবিকাকা একবার ‘নির্ব্বারের স্বপ্নভঙ্গ’ কবিতাটির উপর একটি স্বরসঙ্কিয়ুক্ত পিয়ানোর গং রচনা করতে বলেছিলেন। কথা ছিল যার সবচেয়ে ভালো হবে, তিনি তাকে পুরস্কার দেবেন। আমাদের মধ্যে একমাত্র সুরেনই উংসাহ এবং পরিশ্রম করে এই অহুরোধ রক্ষা করেছিলেন এবং আমার পুরনো খাতার পাতায় তার সাক্ষী এখনো বর্তমান। তাঁর জীবিতকালে কেউ যদি দেশী সুরে স্বরসঙ্কি-সংযোগে কৃতিত্ব দেখাতে পারতেন, তবে নিশ্চয়ই তিনি নিজেই সর্বাগ্রে তাঁকে অভিনন্দন জানাতেন।

রবিকাকা স্বভাবতই ছোট ছেলে ভালোবাসতেন— আমাদের ভাইবোনকে দিয়ে এ বিষয়ে তাঁর হাতে খড়ি হয়। বিলেতে গিয়ে আমাদের সঙ্গে সেই যে তাঁর ভাব হয়ে গিয়েছিল, সেটা দৃশ্যজীবন পর্যন্ত অটুট ছিল। ছেলেদের মন ভালানোর তাঁর একটি উপায় ছিল, নানারকম মজা করে গান গাওয়া।

যেমন ‘আজু মোরগ বন বোলে’ গানটি মধ্যলয়ে আরম্ভ করে দ্রুত হতে দ্রুততর লয়ে গেয়ে যখন ‘তুম সন হম হলমল কর রমকে রমকে ঝোলে’ গাইতেন তখন শেষকালে তাঁর গঠিত দুটি যেন কেবল কাঁপত, আর আমরা হেসে কুটিকুটি হতুম। ‘*Darling, you are growing old*’ প্রভৃতি ইংরিজী গানের সুরও মজা করে টেনে টেনে গাইতেন, কিন্তু সে সুর সুরলিপিতে প্রকাশ করা অসম্ভব। জ্যাঠামশাই আবার আফ্রিকার প্রদেশ-নামগুলিতে সুর বসিয়েছিলেন, যথা—

না সা -১ সা। ধা পা গা মা। গা -ধা -১ না। সা -১ -১ -১।
ই জি প্ট্ হ্য বি আ আ বি সি . . নি যা . . .

রবিকাকা আবার রেলওয়ে লাইনের অক্ষরেও সুর বসিয়েছিলেন, যথা—

গা। পা পা -১। ক্ষা পা -১। ধা পা -১। গা রা -গা।
E I R . G I . P R . D M .

রা সা -১। -১ -১ সা। রা সা -১। নু -সা -১। রা -গা -১।
S R . . . S E Ex. . ten . . sion . .

তখনকার কালে আমাদের মধ্যে অস্ত্রান্ত্র পাশ্চাত্য প্রভাবের মধ্যে হার-মোনিয়ম ও পিয়ানো যন্ত্রের খুব চল ছিল। আগেই বলেছি রবিকাকা কখনো যন্ত্র বাজানোয় মন দেন নি; কিন্তু অবনদাদা এসরাজ বাজাতেন এবং ভাইদের মধ্যে অরুণেন্দ্রনাথ আর আমার দাদা সুরেন্দ্রনাথ কিছুদিন একেবারে নাড়া বেঁধে গয়ার বিখ্যাত এসরাজী টেঁড়ীজীর শিষ্যত্ব গ্রহণ করেছিলেন। জ্যোতিকাকা-মশায়ের পিয়ানো বাজনার সঙ্গে রবিকাকার গান রচনার কথা তো সকলেই জানেন। সেকালে আদি ব্রাহ্মসমাজে দুই থাকের একটি সুন্দর অর্গ্যান-যন্ত্র ছিল। তার উপরের থাক পিয়ানোর মত, আর নীচের থাকটা হারমোনিয়মের মত বাজত। একসময় আদি ব্রাহ্মসমাজে প্রতিমাসেই উপাসনা হত। সেই মাসিক সমাজে রবিকাকার গানের সঙ্গে আমি হারমোনিয়ম বাজাতাম মনে আছে। ‘ভোরের বেলায় কখন এসে’ ‘ভবকোলাহল ছাড়িয়ে’ ‘তবে কি ফিরিব স্নানমুখে’ ‘দাও হে হৃদয় ভরে দাও’ প্রভৃতি গানগুলি কত ভালো লাগত।

তখনকার দিনে রবিকাকার জনপ্রিয় গানগুলির পরিচয় তাঁর ১৮৯৩ খৃষ্টাব্দে প্রকাশিত ‘গানের বহি ও বাস্তবিকপ্রতিভা’ দেখলেই পাওয়া যাবে। রবিকাকা দু-একটি হিন্দী গানও শব্দ করে গাইতেন— যেমন, ‘ক্যায়সে কাটোঙ্গি রয়ন সো

পিয়া বিনে' (বেহাগ), 'জিন ছুঁয়া মোরি বঁইয়া নগরওয়া' (রামকেলি)—এই গানটি থেকেই 'আখিজল মুছাইলে জননী' ভাঙা, এবং 'মন কি কমলদল খোলিয়া' (বাহার) ভেঙে 'এই যে হেরি গো দেবী' রচিত। আর-একটা দৃষ্টান্ত মনে পড়ে গেল— 'লাইরি মোরি শাম ইদোয়িয়া' গানটির স্বর পূর্ববী এবং এর কিছু আভাস নিয়ে বহুদিন পরে 'সমুখে শান্তিপারাবার' গানটির স্বর দেন। তাঁর একটি খাতায় 'সমুখে শান্তিপারাবারে'র কথা আর সেই পাতার কোণে 'লাইরি' শব্দটি লেখা দেখে তাঁর সংগীত-গবেষকরা এই ইঙ্গিতের মর্ম বুঝতে পারেন নি। আমাকে সেই কথা বলায় আমি তাঁদের এই সমস্তার সমাধান করে দিলুম। কতকগুলি নিধুবাবুর টপ্পাও গাইতেন, 'যে যাতনা যতনে'—এর সঙ্গে 'থাম্ থাম্ কী করিবি বধি পাখিটির প্রাণ' গানটির স্বরের মিল লক্ষণীয়। আর দুটি গানও গাইতেন, রাম বসুর 'মনে রইল সেই মনের বেদনা' ও শ্রীধর কথকের 'ভালোবাসিবে বলে ভালোবাসি নে'।

অনেকে তাঁর প্রথমবয়সের গান বেশি পছন্দ করেন, তার ভাষা ও ভাব সরল ও মর্মস্পর্শী বলে। তিনি নিজে আমাকে বলেছেন, 'আমার আগেকার গানগুলি ইমোশনাল, এখনকারগুলি ইন্টেলেক্ট'। এর সুন্দর উদাহরণ পাওয়া যায় মায়ার খেলার দুটি-একটি গানের সেকালের ও একালের রূপের তুলনা করলে। যেমন সেকালের— 'আমি কারেও বুঝি নে শুধু বুঝেছি তোমারে'—বেহাগ (এর সঙ্গে অক্ষয় চৌধুরীর 'কেনই বা ভুলিব তোমায়' গানটির কিছু মিল আছে)। গানটির একালের পরিবর্তিত রূপ 'যে ছিল আমার স্বপনচারিণী'। এইখানে বলে রাখি, কারওয়াবে আমাদের সঙ্গে থাকাকালীন কতকগুলি কানাড়ী গান ভেঙে বাংলা গান রচনা করেছিলেন। রবিকাকা প্রয়োজনানুসারে নানা পুরনো গানের স্বরে অল্প কথ্য বসিয়ে অদলবদল করে নিয়েছেন। যথা, চিত্রাঙ্গদার 'ক্ষমা কর আমায়' গানটির স্বর নেওয়া হয়েছে 'জয় জয় ব্রহ্মণ ব্রহ্মণ' নামক অতি পুরনো ব্রহ্মসংগীত থেকে। বান্মীকিপ্রতিভার 'অহো আশ্রয় একি তোদের' গানটির স্বর 'চরাচর সকলি মিছে মায়া' গান থেকে নেওয়া। শামার 'হায় একি সমাপন' গানটির স্বর বান্মীকিপ্রতিভার 'হা কি দশা হল আমার' থেকে নেওয়া। এই স্বরটির মূল আবার কর্তাদাদামশায়ের মুখে শোনা একটি ফার্সী গান—'হালমে রবে রবা'। বান্মীকিপ্রতিভার 'আয় মা আমার সাথে' গানের স্বর বিবাহোৎসব নাটিকায় তাঁর পুরনো গান

‘মা একবার দাঁড়া গো হেরি চন্দ্রানন’ গানটির অম্লরূপ। কালমুগয়ার ‘কে জানে কোথা সে’ তাঁর আর-একটি পুরনো গান ‘সহে না যাতনা’র স্থরে বসানো। শ্রামার আর-একটি গান ‘কাদিতে হবে রে পাশিষ্ঠা’র স্থর পুরনো ব্রহ্মসংগীতের ‘জাগিতে হবে রে’ (শঙ্করা) থেকে নেওয়া। ‘কী হল তোমার বুঝি বা সখী’ তাঁর একটি পুরনো গানে ‘কী হল আমার বুঝি বা সখী’র কেবল ‘আমার’টুকু পরিবর্তন করে ‘তোমার’ বসানো হয়েছে। বান্ধীকিপ্রতিভার ‘জীবনের কিছু হল না’ গানের মূল ঠাঁই একটি পুরনো গান ‘প্রমোদে ঢালিয়া দিহু মন’। বান্ধীকিপ্রতিভার ‘মরি ও কাহার বাছা’, মায়ার খেলার ‘আহা আজি এ বসন্তে’ এবং কালমুগয়ার ‘মানা না মানিলি’র স্থর ‘Go where glory’ নামে একই আইরিশ মেলডি থেকে ভাঙা।

তেলেনা গানের অর্থহীন শব্দগুলি নিয়ে, যথা, ‘ওদেবতানা দিতাহুম্ তাহুম্ দেরে না’ কেমন ভিন্ন ভিন্ন ভাব প্রকাশ ক’রে রবিকাকা গাইতেন মনে পড়ে— উপরোক্ত শব্দগুলি একবার খুব উত্তেজনাপূর্ণ ভাবে গেয়ে বীররস, আবার টেনে টেনে কোমলভাবে গেয়ে করণরস প্রকাশ করতেন।

আমাদের সংগীতশাস্ত্রে বাহার রাগিণীটিকে বসন্তকালের নববিকাশ প্রকাশের উপযোগী বলে মনে করা হয়। কিন্তু রবিকাকা এই বাহার রাগিণীকে অনেক গানে মনের আবেগ প্রকাশের বাহনরূপে নতুন রূপ দিয়েছেন। যেমন, ‘গেল গেল নিয়ে গেল’ ‘রাখ রাখ ফেল্ ধহু’ প্রভৃতি। সিদ্ধুর মত করণ কোমল রাগকেও কেমন উদ্দীপনা প্রকাশের কাজে লাগিয়েছেন সেটা ‘আমায় বোলো না গাহিতে বোলো না’ গানে লক্ষ্যীয়। অবশ্য লয় ও গায়কী দ্বারা গায়কেরও সে ভাবটা ফুটিয়ে তুলতে হবে। আমার মনে হয়, এসকল ক্ষেত্রে নাট্যরস নামক একটি নবতর রসের অবতারণা করা আবশ্যক হয়ে পড়ে। আমাদের সংগীতে উদ্দীপনার অভাব রবিকাকা নানারকমে পূরণ করেছেন, তাঁর সংগীত-ভক্তগণ চেষ্টা করলে আরও এমন দৃষ্টান্ত মনে আনতে পারবেন।

বাবার কাছে বোম্বাই থাকাকালীন সাহেবদের মহলে এক সময় মায়ার খেলার গানের খুব আদর হয়েছিল এবং উচ্চারণ করতে না পারলেও তারা ‘ভালোবেসে যদি স্থখ নাহি’ গানে ‘টোবে কেন, টোবে কেন’ বলে ধুয়ের যোগ দিত। এর থেকে আমার ধারণা হয়েছে যে, কতকগুলি স্থর স্বভাবের অর্থও কোনো বিশেষ দেশকালে আবদ্ধ নয়। আমি যখন বলি

আমাদের দেশের সংগীতও স্বরসন্ধির ব্যবহারের একেবারে অষোগ্য নয়, বরং এতে তার ঐশ্বর্য বাড়বার সম্ভাবনা— যা নিয়ে অনেক সময় সংগীতজ্ঞদের সঙ্গে মতভেদ হয়— তখন এই ধরণের সর্বজনীন সুরের কথাই আমার মাথায় থাকে।

বিশেষ বিশেষ ঘটনা উপলক্ষ্যে কয়েকটি গান রচিত হয়েছে। যেমন, বঙ্গভঙ্গ-আন্দোলন উপলক্ষ্যে ‘বাংলার মাটি বাংলার জল’ এবং আরো অনেক গান ; সার্ব্ তারকনাথ পালিতের বাড়ি নিমন্ত্রণে, দেশের স্বাধীনতা-আন্দোলন সম্বন্ধে উদাসীন ধারা, তাঁদের প্রতি ভৎসনা হিসেবে ‘আমায় বোলো না গাহিতে বোলো না’। ‘কয়েকটি বিয়ের গানের ইতিহাসও এখানে উল্লেখযোগ্য, যথা— ‘স্বখে থাক আর সুখী কর’ গানটি শ্রীমতী স্নেহলতা সেনের বিবাহোপলক্ষ্যে এবং ‘নবজীবনের যাত্রাপথে’ ‘হৃজনের মিলনের সত্যসাক্ষী যিনি’ ও ‘স্বমঙ্গলী বধু’ গান-ক’টি শ্রীমতী নন্দিনী দেবীর বিবাহোপলক্ষ্যে রচিত। ‘ওহে নবীন অতিথি’ গানটি কোনো বন্ধুকন্টার অন্নপ্রাশনের জন্তু রচিত। একবার, মনে আছে, আদি নববিধান সাধারণ— এই তিন সমাজের মিলিত উৎসব উপলক্ষ্যে জোড়াসাঁকোর বাড়িতে একটি ধর্মসভা হয়। সেই সভার জন্তু রবিকাকা ‘পিতার ছয়ারে দাঁড়াইয়া সবে ভুলে যাও অভিমান’ গানটি রচনা করেন।

ছেলেবেলার গানের স্মৃতির সঙ্গে গানের সাথীও অবিচ্ছেদ্যভাবে জড়িত। আমার দিশী বিলিতী সংগীতের সর্বদা সঙ্গে সাথী ছিলেন সরলাদিদি। আমরা যা-কিছু শিখেছি, তিনিও সঙ্গেসঙ্গে শিখেছেন। পরবর্তী জীবনে তিনি দাক্ষিণাত্য থেকে অনেক সুন্দর সুর সংগ্রহ করেছেন, নিজেও বহু সংগীত রচনা করেছেন। আমার সেজকাকা হেমেন্দ্রনাথও খুব নিষ্ঠাবান শিক্ষাত্রতী ছিলেন। তাঁর ঘরে দিশী বিলিতী সংগীতের যুগল শ্রোত অবিরাম বয়ে চলেছিল। তাঁর বড়মেয়ে প্রতিভাদিদিকে তিনি সর্ববিদ্যাপারদর্শিনী করে তুলতে চেয়েছিলেন। তাঁর চতুর্থ কন্যা মনীষা ‘তমীশ্বরাণাং’ বেদমন্ত্রে এবং রবিকাকার কতকগুলি গানে, যথা, ‘পাদপ্রান্তে রাখ সেবকে’ প্রভৃতিতে পিয়ানোর সংগত বসিয়েছিলেন। সেগুলি তেমন প্রসিদ্ধিলাভ করে নি। তাঁর সেজমেয়ে অভিজ্ঞা রবিকাকার প্রিয় ছাত্রী ছিলেন। তাঁর সুন্দর গলা ও অভিনয়ের ক্ষমতার কথা তাঁর রচনায় উল্লিখিত আছে। সেজকাকার পরিবারের ছেলেরাও সংগীতজ্ঞ ছিলেন। পরবর্তীকালে তাঁর নাটবউ অমিয়াদেবী সুকণ্ঠ ও শিক্ষাগুণে রবীন্দ্রসংগীতে নাম

করেছিলেন। সেজ্জাকার নাতনী শ্রীমতী বাণী চট্টোপাধ্যায় এখন পর্যন্ত বংশের ধারা রক্ষা করে চলেছেন।

জ্যাঠামশায় বিজ্ঞেন্দ্রনাথের ঘরে সেরকমভাবে ওস্তাদ রেখে গান শেখাবার পদ্ধতি না থাকলেও, হারমোনিয়ম বাজিয়ে দু-একখানা গান না করতে পারে এমন ছেলে তখন জোড়াসাঁকোর বাড়িতে ছিল না বললেই হয়। তাঁর মেজ-ছেলে অরুদাদার রীতিমত এসরাজ শেখবার কথা আগেই বলেছি। তাঁর বড়-মেয়ে সরোজদিদির যেমন সুন্দর চেহারা তেমনি মিষ্টি গলা ছিল। ছোটমেয়ে উষাও দলের সঙ্গে গাইতেন। নাতিদের মধ্যে সৌম্যেন্দ্রনাথ এখনো বংশের ধারা বহন করে চলেছেন। তবে দিনেন্দ্রনাথই একাধারে যেমন তাঁর সর্বজ্যোষ্ঠ তেমনি সর্বশ্রেষ্ঠ সংগীতজ্ঞ নাতি, যার খ্যাতি শান্তিনিকেতন-পর্ব পর্যন্ত চলে এসেছে। দিহু তিন বছর বয়স থেকেই যেসব গান গেয়ে বেড়াত ছোটমুখে বড়কথা হিসেবে তা শুনে আমাদের হাসি পেত, যেমন, ‘নিবারো নিবারো প্রাণের জন্মন, কাটো হে কাটো হে এ মায়াবন্ধন’। আর, কিছুদিন পরে নাকি জ্যাঠামশায় পাশের ঘর থেকে শুনেছেন, দিহু গাইছে— গানটি জ্যাঠামশায়েরই রচিত— ‘শয়ন ভিজিল নয়নজলে, ওলো সজনি’; অমনি তাকে ডেকেছেন, ‘দিহু, এদিকে এসো’। দিহু এসে অধোবদনে দাঁড়িয়ে রইল। ‘এ গান তুমি কার কাছে শিখলে?’ দিহু নতমস্তকে নিরুত্তর। ‘খবরদার, এ গান আর গাবে না’। ষবনিকা পতন।

আমি রবিকাকার কাছে আলাদা করে বসে কখনো গান শিখেছি বলে মনে পড়ে না। কেবল বাড়িময় হাওয়ায় হাওয়ায় যে গান ভেসে বেড়াত তাই শুনে শুনে শিখেছি। পরবর্তীকালে বরং আমার বালিগঞ্জের কমলালয় বাড়িতে পিয়ানোর কাছে বসে তিনি আমাকে দু-একটা গান শেখাতে চেয়েছেন বলে মনে পড়ে, যেমন, ‘কে গো অন্তরতর সে’ প্রভৃতি। আর, আমার গান শিখতে দেরি হয় বলে মস্তব্য করায় আমি একটু স্ক্লু হয়েছিলুম। দিহু এবং খুঁ (অমিতা সেন) যেরকম তাড়াতাড়ি গান শিখত শুনেছি, তার ভুলনায় আমাদের যে টিমে তেতালা মনে হবে তার আর আশ্চর্য কি। খুঁর স্বল্পায়ু জীবনের মধ্যে তার সঙ্গে আমার ঘনিষ্ঠতা হবার সুযোগ হয় নি, তবে কলকাতায় কোনো স্ত্রে তার গান শোনবার সুযোগ হয়েছিল। প্রেসিডেন্সি কলেজে রবীন্দ্র-পরিষদ নামক একটি সভা উপলক্ষ্যে আমি আহৃত হয়ে সেখানে একটি ছোট

প্রবন্ধ পড়ি। রবিকাকাও নিমন্ত্রিত হয়ে থুকুকে সঙ্গে করে আসেন এবং থুকু তাঁর পাশে বসে শুধু-গলায় ‘আমার মল্লিকাবনে’ গানটি সুন্দর গায়। তার অনেকদিন পরে শান্তিনিকেতনে দুদিনের জ্ঞা এসে উত্তরায়ণের সামনে টেনিসকোর্টে বসে দেখেছি থুকু চার-পাঁচ বার ক্রমাগত শ্রামলীতে রবিকাকার কাছে যাতায়াত করছে। পরে শুনেছি যে, সেই সময় রবিকাকা তাঁর বড় বড় কবিতায় স্বর দেওয়ার নতুন রীতি প্রবর্তন করছিলেন, সেই গান শেখবার জ্ঞাই এত ছুটাছুটি।

যতদূর জানি সংস্কৃত স্তোত্রে স্বর রবিকাকাই প্রথম দিতে আরম্ভ করেন। সেই থেকে আজ পর্যন্ত একরকম নিয়মই হয়ে গেছে যে, মাঘোৎসব আরম্ভ হবে একটি বেদগান দিয়ে। তার পরে তাঁর পরিবারের দু-একজন তাঁকে অল্পসরণ করে সংস্কৃত স্তোত্রে স্বর বসিয়েছেন। যথা, বিখ্যাত ‘ত্ৰ্যমাদিদেব পুরুষপূরণ’ স্তোত্রটিকে প্রতিভাদিদি কেশরা রাগিণীতে স্বর বসান। ‘সংগচ্ছধ্বম্’ স্তোত্রের স্বর ‘আনন্দলোকে’র স্বরেরই রূপান্তর; এই স্বরটি সরলাদিদি মহীশূর থেকে সংগ্রহ করেছিলেন। পরে বিশ্বস্তসূত্রে শুনেছি সেটি মহীশূরের জাতীয় সংগীতের স্বর। সংস্কৃত স্তোত্রের দীর্ঘ হ্রস্ব স্বরের উচ্চারণের রীতি রক্ষার প্রতি রবিকাকা খুবই সতর্ক ছিলেন। প্রতিভাদিদির স্বর দেওয়া গীতাস্তোত্রটি মাঘোৎসবে গাওয়া হবে বলে জোড়াসাঁকোর উঠানে মহড়া চলছে। রবিকাকা অসুস্থ হয়ে তেতলার ঘরে শুয়ে শুয়ে শুনছিলেন। মনে আছে, তিনি আমাকে উপরে ডেকে পাঠিয়ে এক জায়গার স্বরটা ঠিক করে দীর্ঘ হ্রস্ব উচ্চারণের সঙ্গে মিলিয়ে বসাতে বলে দিলেন।

আত্মীয়স্বজনের সঙ্গে সংগীতচর্চার কথা বাদ দিলে বাইরের বন্ধুবর্গের মধ্যে প্রথমেই মনে পড়ে অক্ষয় চৌধুরী এবং বিহারীলাল চক্রবর্তীর কথা। শেষোক্তের সঙ্গে আমার চাক্ষুষ পরিচয় ছিল না। পরে অবশ্য তাঁর ছেলেদের ঘনিষ্ঠ সংস্পর্শে আসি। লোকে বলে যে, তাঁর রচনার প্রভাব রবিকাকার কবিতায় লক্ষিত হয়, বিশেষত বান্ধীকিপ্রতিভায় সরস্বতী-বন্দনাদিতে। সম্ভবত রবিকাকার কাছেই তাঁর কতকগুলো গান শুনে শুনে শিখেছিলুম, যা আমার গানের খাতায় লেখা আছে। সপরিবার অক্ষয় চৌধুরীর সঙ্গে আমাদের ছেলেবেলা থেকে অতি ঘনিষ্ঠ পরিচয় ছিল। তাঁর রচিত কতকগুলি গান সশরীরে রবিকাকার গীতিনাটো স্থান পেয়েছে, যেমন, ‘রাঙা পদপদ্মযুগে’ ও ‘এত রঙ্গ শিখেছ

কোথা'। যেমন বিহারী চক্রবর্তীর 'নয়ন-অমৃতরাশি প্রেয়সী আমার' তেমনি অক্ষয় চৌধুরীরও একটি প্রেমের গান 'কেন গো ভুলিব তোমায়' সেকালে খুব জনপ্রিয় ছিল।

গায়ক বন্ধুদের মধ্যে বিজ্ঞেন্দ্রলাল রায় আর অতুলপ্রসাদ সেন স্বনামধন্য। তাঁদের কাছে তাঁদের নিজের গান শেখবার সৌভাগ্যও আমার হয়েছে। এইখানে কৃষ্ণনগরের একটি ছোট্ট ঘটনার কথা বলে নিই। অনেকেই শুনেছেন যে, রবিকাকা এবং সত্যদাদা যখন দ্বিতীয় বার বিলেত যাত্রা করেন তখন মাঝপথে মাদ্রাজ থেকেই ফিরে আসেন। এ যাত্রা এক হিসেবে নিষ্ফল হলেও আর-এক দিক থেকে আমাদের পরিবারের পক্ষে 'সুফলপ্রসূ' হয়েছিল। কারণ এই জাহাজেই শুনেছি আমার বড়ভাগুর আশুতোষ চৌধুরীর সঙ্গে রবিকাকার প্রথম ঘনিষ্ঠতা হয়। তখন থেকেই রবিকাকা তাঁর প্রতি আকৃষ্ট হন এবং কুটুম্বিতাস্থ্রে আবদ্ধ হবার কল্পনা মনে পোষণ করেন। পরে প্রতিভাদিদির সঙ্গে তাঁর বিবাহের প্রস্তাব নিয়ে রবিকাকা কৃষ্ণনগরে গুঁদের বাড়িতে গিয়ে দেখা করেন। কৃষ্ণনগরে তখন রামতনু লাহিড়ীর ছেলে সত্য লাহিড়ীকে কেন্দ্র করে একটি উচ্চাঙ্গ গানের আসর ছিল, আমার স্বামীও তাতে যোগ দিতেন। পরে তাঁর কাছেই শুনেছি যে, সেই আসরে রবিকাকাকে গান গাইতে বলায় তিনি 'বাঁশরী বাজাতে চাহি বাঁশরী বাজিল কই' গানটি গেয়েছিলেন। এবং সেইসব উচ্চাঙ্গসংগীতপ্রিয় শ্রোতাদের কাছ থেকে নাকি অনেক বাক্যবাণ তাঁর উপরে বর্ষিত হয়েছিল, যেমন, 'হ্যাঁ, বাঁশরী অনেকেই বাজাতে চায়, কিন্তু বাঁশরী বাজাতে চাইলেই কি বাঁশরী বাজে। বাঁশরী বাজাতে হলে শিক্ষা চাই' ইত্যাদি। কারণ সে সরল স্রবের ভিতর তাঁদের অভ্যস্ত তানকর্তব্য তাঁরা খুঁজে পান নি।

বাইরের মেয়েদের ভিতর গায়িকা হিসেবে অমলা দাসকে আগে মনে পড়ে। এখনও গ্রামোফোনে তাঁর সুন্দর চড়া গলায় 'একি আকুলতা ভুবনে' এবং 'চিরসখা হে' শুনে লোকে শিক্ষা ও আনন্দ দুইই পায়। তাঁর গাওয়া একটি হিন্দী গান 'সৈয়া জাঁউ জাঁউ' ভেঙে 'পিপাসা হায় নাহি মিটল' গানটি রচিত। বঙ্কিমবাবুর মৃণালিনীর 'যমুনারি জলে মোরে' এবং 'মথুরাবাসিনী মধুরহাসিনী' গান দুটি তিনি খুব গাইতেন। কলকাতার কোনো এক কংগ্রেসে অমলা দুশ হাজার লোকের সভায় একলা 'বন্দে মাতরম্' গানটি বিনা মাইকে শুনিয়েছিলেন। তাঁর

গলা যেমন মিষ্টি তেমনি সতেজ ছিল। এদিকে গৃহস্থালীতেও তিনি স্থপটু ছিলেন। নাটোরের মহারাজার সংসারে যখন মহারানীর সহচরী হিসেবে ছিলেন, তখন রাজবাড়ির নেমস্তম্বে তাঁর রান্না খেয়ে কত ভৃষ্টি লাভ করেছি।

ব্রাহ্মসমাজের কতকগুলি পরিবারের সঙ্গে রবিকাকার বিশেষ ঘনিষ্ঠতা ছিল। যেমন চিত্তরঞ্জন দাশের পরিবার, সারু কে. জি. গুপ্তের পরিবার, ডাক্তার নীলরতন সরকারের পরিবার ইত্যাদি। এঁদের সকলেরই ঘরে স্থগায়িকা ছিলেন, ঋাণা রবিকাকার কাছেই তাঁর গান শেখবার সুযোগ পেয়েছেন। যেমন ডাক্তার নীলরতনের বড়কন্ঠা নলিনী, তাঁর অপর এক কন্ঠা অরুন্ধতী, সুকুমার রায়ের স্ত্রী সুপ্রভা, কনক দাস, সাহানা বসু। ডাক্তার নীলরতন সরকারের মেয়েরা এখনো পর্যন্ত দেশী-বিলিভী সংগীতের একসঙ্গে চর্চা রেখেছেন।

জোড়াসাঁকোর বাড়ির পিছনের বাগানে প্রথম যে বর্ষামঙ্গল হয় তাতে বড়-ঝুঝু সাহানা বসু ও ছোটঝুঝু চিত্রলেখা সিঙ্কাস্তের দুটি গান ‘বাদল-মেঘে মাদল বাজে’ আর ‘ঐ যে ঝড়ের মেঘের কোলে’ কী অপূর্ব স্নদের লেগেছিল— যেন মধুঢালা।

এ পর্যন্ত রবিকাকার শান্তিনিকেতনবাসের পূর্বেকার সংগীতস্বত্তির কথা বলেছি। কয়েকটি বিশেষ বিশেষ জায়গার সঙ্গে রবিকাকার তখনকার কালের গানরচনার স্বত্তি জড়িত আছে। একবার দার্জিলিং বেড়াতে গিয়ে এক ঝাঁক গান নিয়ে এলেন, ‘বেলা গেল তোমার পথ চেয়ে’ ইত্যাদি; আবার শিলাইদহের বোটে বসে হয়তো আর-এক ঝাঁক রচনা করেছেন। কিন্তু নোবেল প্রাইজ পাবার পরে যে গান রচনা আরম্ভ করলেন সে কেবল ঝাঁকে ঝাঁকে নয়, যেন ধারাবাহিক স্রোতের মত বইতে লাগল। সে স্রোত প্রায় জীবনের শেষ পর্যন্ত বয়ে চলেছে।

শান্তিনিকেতনে ব্রহ্মচর্য আশ্রম স্থাপনের পরেও রবিকাকা কয়েক বছর কলকাতায় ঘন ঘন যাতায়াত করতেন। তাই সেখানকার রবীন্দ্রভক্তরা তাঁর নব নব সংগীত ও সাহিত্যরস উপভোগে বঞ্চিত হত না। এই মধ্যবর্তী সময়ের উল্লেখযোগ্য ঘটনার মধ্যে মনে পড়ে প্রতিভাদিদির স্থাপিত ‘সংগীতসংঘে’ রবিকাকা তাঁর ‘সংগীতের স্মৃতি’ নামে বিখ্যাত প্রবন্ধটি পড়েছিলেন। উদাহরণ-গুলি নিজেই গেয়েছিলেন। এখনকার বিশ্বভারতী গ্রন্থন-বিভাগের বাড়িতে ‘বিচিত্রা’ আসরের কথাও অনেকের জানা আছে। তাতে তিনি সকলকে

ভিন্ন ভিন্ন কাজের ভার দিয়েছিলেন। তাঁর অত্যন্ত স্নেহের পাত্রী পুত্রবধূ প্রতিমাকে একটি জরিব ফিতে দিয়েছিলেন— আসরের বন্ধুদের যাতে সৌজন্ত আর প্রীতির ডোরে বেঁধে রাখতে পারেন, তারই প্রতীকস্বরূপ। এক আসরে একবার মনে আছে সৌম্যেন্দ্রের স্ত্রী শ্রীমতী রবিকাকার ‘হৃদয় আমার নাচে রে’ আবৃত্তির সঙ্গে নিজস্ব আঙ্গিকে রচিত একটি নাচ দেখিয়েছিলেন। আর-একবার রবিকাকা বিলেতে বাজনার সঙ্গে কবিতা আবৃত্তির পদ্ধতি শুনে এসেছিলেন, সে পরীক্ষা এখানেও করেন। আজকাল সেতারের গতের সঙ্গে গান কুরবার যে ধারা প্রচলিত হয়েছে তারও বোধ হয় প্রথম নমুনা আমরা বিচিত্রার আসরে শুনিয়েছিলুম ‘মধুর মধুর ধ্বনি বাজে’ গানটির সঙ্গে একটি ভূপালীর গৎ জুড়ে।

নাট্যস্মৃতি

আমার নাট্যস্মৃতি অনেকাংশে সংগীতস্মৃতির সঙ্গে জড়িত, কারণ রবিকাকা প্রথমজীবনে গীতিনাট্যই রচনা করেছিলেন। আমাদের কালের ব্যক্তিগত স্মৃতি আরম্ভ হয় স্বভাবতই বিলেত থেকে ফিরে আসবার পর থেকে। মা আত্মীয়-স্বজন নিয়ে ঘরোয়া অভিনয় করাতে খুব ভালোবাসতেন। সেজন্ত অনেকসময় তাঁর কত মান-অভিমান ভাঙাতে হত, সে গল্পও তাঁর কাছে শুনেছি।

মানময়ী

তাঁরই প্ররোচনায় সম্ভবত মানময়ী নাটক (প্রথম প্রকাশ ১৮৮০) জোড়াসাঁকোর বাড়িতে আপনাআপনি মध्ये অভিনীত হয়। এটি কার রচনা সেকালে আমাদের অসুসন্ধান করবার কোনো প্রবৃত্তি হয় নি, তবে এখন মনে পড়ে রবিকাকা জ্যোতিকাকা স্বর্ণপিসিমা অনেকসময় মিলেমিশে গীতিনাট্য রচনা করতেন।

মানময়ীর বিষয়বস্তু সম্বন্ধেও আমার কেবলমাত্র একটা অস্পষ্ট ধারণা আছে। দেবদেবীর মানভঞ্জন নিয়েই কারবার— তা নামেই প্রকাশ। মানময়ীর অভিনয়ে দেবতাদের মধ্যে রবিকাকা আর জ্যোতিকাকামশায় ছিলেন মনে আছে।

সব-প্রথমেই ছিল রতি ও বসন্তের গান—

রতি। ছিলে কোথা বল, কত কি যে হল

জান না কি তা?

হায়, হায়, আহা!

মান দায় যায় যায় বাসবের প্রাণ।

এখানে কি কর,

তুমি ফুলশর,

তারে গিয়ে কর ত্রাণ।

বসন্ত। চল চল, চল চল, চল চল, ফুলধুহু,

চল যাই কাজ সাধিতে।...

আর-এক জাতের গান মানময়ীতে ছিল যা আমাদের ঐ বয়সে গাওয়া অকালপক্বতা বলে নিশ্চয় সকলে মনে করবেন—

উর্বশী । সজ্জনী লো বল, কেন কেন এ পোড়া প্রাণ গেল না ?...

এনে দে এনে দে বিষ, আর যে লো পারি না ।

কিন্তু আমরা সমবয়সী দল নিঃসংকোচে এ গান বাড়িময় গেয়ে বেড়াতুম ।

বসন্ত-উৎসব

স্বর্ণপিসিমার গীতিনাট্য ‘বসন্ত-উৎসবে’র (প্রথম প্রকাশ ১৮৭২) সঙ্গেও আমাদের ছেলেবেলার স্মৃতি জড়িত । তার গোড়ার দিকের গান ‘ধব্ লো ধব্ লো ডালা, এই নে কামিনীফুল’ এখনও কানে বাজে ।

অন্য গানগুলিও কতক কতক মনে আছে—

লীলা । চন্দ্রশূ তারাশূ মেঘাঙ্ক নিশীথ চেয়ে

দূরভেদ্য অঙ্ককারে হৃদয় রয়েছে ছেয়ে ।...

ঢালা বাগেশ্রী রাগিণীতে এই শোকসংগীত নতুনকাকিমা বসে গাইছেন, তাঁর বড় বড় চোখ আর দীর্ঘ ধন কেশ ছিল বলে তাঁকে বেশ মানিয়েছিল । জ্যোতি-কাকা আর রবিকাকা দুজনে মিলে টিনের তলোয়ার নিয়ে এই গানটি গেয়ে যুদ্ধ করেছিলেন—

কিরণ । লও এই লও, লও প্রতিফল ।

কুমার । দেখিব বীরত্ব তোর থাকে কি অটল ।

কিরণ । মুচ হ রে সাবধান ।

কুমার । এ অমোঘ সন্ধান ।

কিরণ । এ আঘাতে অবশ্যই বধিব পরান ।

এই নাটকটি পরে সখিসমিতির পক্ষ থেকে কোনো বাগানবাড়িতে অভিনীত হয় । যদিও সেখানে পুরুষের প্রবেশ নিষেধ ছিল, কিন্তু স্বীকার করতে লজ্জা নেই যে তাঁদের সাহায্য ছাড়া আমাদের পক্ষে স্টেজ বাঁধা সম্ভব ছিল না । এই নাটকে সুরেন আর জ্যোৎস্নাদাদা আমাদের প্রধান সহকারী ছিলেন । স্টেজের পশ্চাৎপটকে বনের উপযোগী করে সাজাতে গিয়ে তাঁরা দুই ধলুধরে মিলে বাঁশের জাফুরির উপর শুকনো মস্ ওঁজৈ তার মধ্যে জাঙ্গলায় জায়গায় ডিমের খোলাতে সলতে জেলে জোনাকির ভাব আনতে চেয়েছিলেন । আগুন

ও ঘাসের এই ঘনিষ্ঠ সম্বন্ধের যে অবশ্যস্বাবী পরিণতি তাঁদের ছেলেমানুষী বুদ্ধিতে বুঝতে পারেন নি, তা শীঘ্রই প্রকাশ পেল। পশ্চাৎপটের মাঝেমাঝে আগুন ধরে গেল। চারি দিকে হৈহল্লা পড়ে গেল। আমরা মেয়েরা ছুটাছুটি করে নাবার ঘরের টব থেকে জল আনতে লাগলুম, আর সুরেন ও জ্যোৎস্নাদা অগত্যা কামিজের আন্ত্রিন গুটিয়ে পর্দা ছেড়ে বাইরে আসতে বাধ্য হলেন। সে এক হাস্যকর ব্যাপার, যদিও আর-একটু বেশিদূর গড়ালে কান্নাকাটি পড়ে যেতে পারত।

এই সময়কার একটি হাসির গানও মনে পড়ে—

ছিলি যেখানে সেখানে যা রে ভূঙ্গ !
চটক-ফটক দেখালে কি হবে
আস্কারা মাস্কারা পেয়ে করিস নে কো রঙ্গ ।
করিস নে করিস নে মিছে ত্রাকেরা
রাগে গর গর গর গর গর গর জলিছে অঙ্গ ।

বিবাহের পক্ষে ও বিপক্ষে

মানময়ীর আগে কি পরে ঠিক মনে নেই, রবিকাকা ও জ্যোতিকাকা দুই ভাইয়ে মিলে অভিজ্ঞাত বন্ধুবর্গের চিত্তবিনোদনের জন্তু বিবাহঘটিত একটি ক্ষুদ্র গীতি-নাটিকা অভিনয় করেছিলেন। তাতে তাঁরা দুজনে বিবাহের পক্ষ ও বিপক্ষ অবলম্বন করে গান করেছিলেন। রবিকাকা বিবাহের সপক্ষে গাইতেন—

একা একা এতদিন কেটে গেল এখন দুখের নিশা প্রভাত হল।

আর না জালা সব’

দুজনে এক হব

সোহাগে সদা রব ঢল ঢল।

তাহারি মুখ চেয়ে

যামিনী যাবে বয়ে

নিবাব তারি প্রেমে হৃদি-অনল ॥

তায় পর বিপক্ষে জ্যোতিকাকা গাইলেন—

ঘ্যানর ঘ্যানর ঘ্যানর ঘ্যানর— সেই সে কাঁছনি কি কব সখা ।

কথায় কথায় অভিমান ছারি, সাধ্য কি যে সে মন রাখা ।

গৃহে থেকে সাধ করে— অরণ্যে যে হবে থাকা ॥

তার পর আবার সপক্ষের গান—

সখা সাধিতে সাধাতে কত স্মৃথ
তাহা বুঝিলে না তুমি মনে রয়ে গেল দুখ ।
অভিমান আঁখিজল নয়ন চল ছল
মুছাতে লাগে ভালো কত
তাহা বুঝিলে না তুমি মনে রয়ে গেল দুখ ॥

এই গানটি গীতবিতানে স্থান পেয়েছে ।

এই অভিনয়ের সঙ্গে সামান্য একটি মজার স্মৃতি জড়িত আছে । পাইকপাড়ার কান্তিচন্দ্র সিংহ, স্বরেন স্কন্দর ছেলে ছিলেন বলে তাঁকে আদর করে কোলে নিয়ে দর্শকদের মধ্যে বসে ছিলেন । তিনি এই নাটক দেখে এত হাসলেন যে, স্বরেন গড়িয়ে তাঁর চোকির নীচে পড়ে গেলেন ।

হৈয়ালি নাট্য

এর পরে ছেলেবেলার স্মৃতি জড়িত রবিকাকার হৈয়ালি নাট্যের সঙ্গে । বাবা চিরদিনই জীশিক্ষা এবং জীবাধীনতার পক্ষপাতী ছিলেন । সেইজন্তেই বোধ হয় বোনদের মধ্যে স্বর্ণপিসিমাকে বেশি ভালোবাসতেন । আমাদেরও তাঁদের পরিবারের সঙ্গে বেশি ঘনিষ্ঠতা ছিল । স্বর্ণপিসিমারা জোড়াসাঁকো ছেড়ে এক-সময়ে কাশিয়াবাগান অঞ্চলে একটি বাগানবাড়িতে গিয়ে ছিলেন । সেখানে আমাদের সকলের খুব যাওয়া-আসা ছিল ; রবিকাকাও মাঝেমাঝে যেতেন এবং আমাদের আমোদপ্রমোদে যোগ দিতেন । এই স্মৃত্তে তাঁর ‘খ্যাতির বিড়ম্বনা’ (সাময়িক পত্রে প্রথম প্রকাশ ১২২২ মাঘ : ১৮৮৬ খৃষ্টাব্দ) নাটকটি নিজেরাই অভিনয় করে আমাদের প্রচুর আনন্দ দেন । আর-একটি কথা মনে পড়ে— অঙ্কুরেই যেমন বৃক্ষের পরিচয় পাওয়া যায় তেমনি সরলাদি আর হিরণদিদিও এইখানেই পাড়ার মেয়েদের শিখিয়ে পড়িয়ে তাঁদের ভবিষ্যৎ কর্মজীবনের সূচনা করেছিলেন ।

বান্দীকিপ্রতিভা

বান্দীকিপ্রতিভা (প্রথম প্রকাশ ১৮৮১) ও কালমৃগয়ার (প্রথম প্রকাশ ১৮৮২) নাট্যস্মৃতির কথা বলতে গিয়ে প্রথমেই মনে পড়ে যে, এই দুটি নাটকেই আমরা

যোগ দিয়েছিলুম। বান্ধীকিপ্রতিভায় আমি একবার লক্ষী সেজেছিলুম, রবিকাকা বান্ধীকি। তবে ১৮৮১ সালে প্রথম বান্ধীকিপ্রতিভা অভিনয়ে নয়, সেবারে প্রতিভাদিদি সরস্বতী আর বোধ হয় সুশীলাদিদি লক্ষী সেজেছিলেন। জ্যাঠামশায়ের একটু অভ্যাস ছিল হঠাৎ হঠাৎ ‘এই যে অমুক সাহেব’ বলে স্নেহভাজনদের পিঠি খাবুড়ে দেওয়া। প্রথম বান্ধীকিপ্রতিভার অভিনয়ের পরে প্রতিভাদিদি সরস্বতী সেজে তাঁর সঙ্গে দেখা করতে এলে তিনি তাঁর পিঠি খাবুড়ে ‘এই যে সরস্বতী সাহেব’ বললেন! আমি সেখানে তখন উপস্থিত।

অভিনয়ক্ষমতা যে আমার খুব ছিল না, তার প্রমাণস্বরূপ একটি ঘরোয়া সাক্ষীর কথা উল্লেখ করব। লক্ষীর ভূমিকায় আমার একমাত্র গান ‘কেন গো আপন মনে’র ‘আমার শুভক্ষণে হের গো চোখে’ অংশটি গাইবার সময় যখন বুকে হাত দিয়ে নিজেকে দেখাতুম, তখন অভি হেসে বলত, ‘বোনদিদি, অমন কোরো না। মনে হয় যেন পেট কামড়াচ্ছে!’ এই বোনদিদি সম্বোধনের ইতিহাসটুকু হচ্ছে, অভি আমার চেয়ে মোটে পনেরো দিনের ছোট ছিল। অভি একাসনে বসে সমস্ত বান্ধীকিপ্রতিভা বা মায়ার খেলার গানগুলি প্রথম থেকে অভিনয় করে গেয়ে শ্রোতাদের মুগ্ধ করে রাখতে পারত।

এই এক বান্ধীকিপ্রতিভা যে কত বার কত সূত্রে অভিনীত হয়েছে এবং আত্মীয়বন্ধুর মধ্যে কত ভিন্ন ভিন্ন লোকে যে এর বিভিন্ন চরিত্রে অভিনয় করে অপ্রত্যাশিত পারদর্শিতা দেখিয়েছেন, তা বলতে গেলে একটা বই হয়ে যায়। বাবা একবার বিলেত থেকে আসবার সময়ে তাঁর সহযাত্রী তখনকার লাট-পত্নী লেডী ল্যান্সডাউনকে জোড়াসাঁকোর বাড়ি আসবার আমন্ত্রণ জানিয়েছিলেন। এখানে বলে রাখলে ক্ষতি নেই যে, ইংরেজ জাতির গুণ ও তাদের সামাজিক প্রথার প্রতি বাবার স্বাভাবিক প্রীতি ছিল। কলকাতায় আসবার পর লাট-পত্নী এই নিমন্ত্রণ রক্ষার অভিপ্রায় জানালে তাঁর জ্ঞাত বান্ধীকিপ্রতিভার একটি বিশেষ অভিনয়ের ব্যবস্থা হয়। লেডী ল্যান্সডাউনের সঙ্গে তখনকার ছোটলাট-পত্নী লেডী এলিয়ট প্রভৃতি আরও কয়েকজন বিশিষ্ট ইংরেজ ছিলেন। বলা বাহুল্য, তাঁদের যথাযোগ্য সমাদর দেখাবার জ্ঞাত কর্তৃপক্ষ যথাসাধ্য চেষ্টা করেছিলেন। দ্বিপুদাদা তাঁর স্বতঃসিদ্ধ রসিকতা করে বলেছিলেন, ‘জোড়াসাঁকোর উঠানের সাজসজ্জা দেখে লাট-পত্নী বাড়ি গিয়ে নিশ্চয়ই লাট-সাহেবকে বলবেন— Darling! All velvet and festoons!’

অক্ষয় চৌধুরী যেমন পারিবারিক বন্ধু বলে আমাদের ছেলেবেলার স্মৃতির সঙ্গে অবিচ্ছেদ্যভাবে জড়িত, তেমনি অক্ষয় মজুমদার বলে আর-একজন ছিলেন, যিনি অভিনয় ও সংগীত দুয়েতেই জোড়াসাঁকোর বাড়ির সঙ্গে ঘনিষ্ঠভাবে যুক্ত ছিলেন। দুজনের একই নাম বলে আমরা তাঁদের যথাক্রমে ছোট-অক্ষয়বাবু আর বড়-অক্ষয়বাবু বলে উল্লেখ করতুম। বড়-অক্ষয়বাবুর খুব দরাজ গলা ছিল, যেটি মাঘোৎসবের উঠোনে ঋগ্বেদ গাইবার সময় বিশেষ কাজে লাগত। তাঁর আর-একটি অভ্যাস ছিল যে, তাঁর যে চড়া স্বর গলায় কুলোত না সেটি উর্ধ্বে ইঙ্গিত করে দেখিয়ে দিয়ে কাজ সারতেন। তাঁর এক রোগ ছিল লেখকের রচনার উপর নিজের কথার রঙ চড়ানো। তাতে আরও রসিকতা বাড়বে বলে মনে করতেন। রাজা ও রানীতে স্মিত্রা রাজ্য ছেড়ে চলে যাবার সংবাদে যখন বিক্রম অত্যন্ত বিচলিত, সেই সময়ে ত্রিবেদীর (বড়-অক্ষয়বাবু) সঙ্গে পথে দেখা হল। রানীকে ত্রিবেদী যেতে দেখেছেন শুনে বিক্রম যখন ব্যাকুল হয়ে জিজ্ঞেস করলেন, ‘চোখে অশ্রু ছিল?’ সেই নাট্যরসের গান্ধীর্ঘ নষ্ট করে তিনি নাক ফুলিয়ে বললেন, ‘ওচ্ছ, ফোচ্ছ, দেখি নাই চোখে’—মূল নাটকে শুধু আছে ‘অশ্রু দেখি নাই চোখে’। আর-একবার বাবা যখন জোড়াসাঁকোর বাড়িতে রাজা ও রানীর অভিনয়ের পরিচালনা করছেন, তখন বড়-অক্ষয়বাবু কোনো-এক ভূমিকায় তাঁর বক্তব্যের অতিরিক্ত ‘সন্দেশ মন্দেশ রসগোলা ফসগোলা’ জুড়ে দেওয়াতে বাবা ভীষণ বিরক্ত হয়েছিলেন। তাতে অক্ষয়বাবুর এমন অভিমান হল যে, তিনি তাঁর পরবর্তী অভিনয়ে কথাগুলি কিছুমাত্র রসকষ না দিয়ে একেবারে শুকনো ভাবে বলে গেলেন। তখন বাবাকে মা বলতে লাগলেন, ‘তুমি কেন ওঁকে এমন করে বললে, এখন দেখ কি করে অভিনয় চলবে।’ তখন আবার তাঁর মানভঙ্গন করবার জন্ত তাঁকে পঞ্চাশটি টাকা এবং একটি শাল ঘুষ দিয়ে তবে বাগ মানানো গেল। বড়-অক্ষয়বাবুর দৃঢ় বিশ্বাস ছিল যে স্বেয়োগ পেলে তিনি শুধু কমেডি নয় ট্রাজেডিও ভালো অভিনয় করতে পারেন। বিচিত্র মাহুষের আত্মপ্রত্যয়!

এহেন অক্ষয়বাবু বাস্তবিকপ্রতিভার পূর্বোক্ত বিশেষ অভিনয়ে লাট-পত্নীর সামনে প্রথমদৃশ্য সেজে খুব ফুর্তির সঙ্গে অভিনয় করেছিলেন। তাঁরা ভাষা না বুঝতে পারলেও অজ্ঞভঙ্গির দ্বারা বিষয়টা ব্রহ্মেই বুঝে নিতে পেরেছিলেন। অক্ষয়বাবু প্রথম বারের পর দ্বিতীয় বার যখন রঙ্গমঞ্চে প্রবেশ করলেন তখন লেডী

এলিয়ট নাকি বলেছিলেন, 'He is my man'। ছোটলাট-পত্নী তাঁকে my man বলেছেন এই গৌরবের কথা অক্ষয়বাবু চিরদিন সকলের কাছে গল্প করে বেড়িয়েছেন। অবনদাদার 'ঘরোয়া'তে আমাদের বাড়ির নাটক-অভিনয়ের সুন্দর বর্ণনা আছে।

কালমুগয়া

কালমুগয়ার অভিনয়ও প্রায় সমসাময়িক এবং এটিও অনেকবার অভিনীত হয়েছে। আমি একবার এই নাটকটি করাতে গিয়ে একটু বিপদে পড়ে গিয়েছিলুম। দিহু সেজেছিলেন অক্ষমুনি এবং তাঁর ভাণ্ডে ও ভাণ্ডী সঞ্জীব আর সুরমা সেজেছিল ঋষিকুমার ও লীলা। দিহু বললে, 'ঋষিকুমারবধের পরে যে সঞ্জীবকে খাটিয়ায় করে নিয়ে আসবে সে আমি দেখতে পারব না।' আবার ঋষিকুমারের ফিরতে দেরি দেখে তার বোন সুরমা 'বলো বলো পিতা কোথা সে গিয়েছে' গাইতে গাইতে চক্ষের জলে বক্ষ ভাসিয়ে দিল। এসব দেখে শুনে আমি বললুম, 'থাক, কালমুগয়ার আর অভিনয় করে কাজ নেই।'।

এমন কর্ম আর করব না

কালানুক্রমে আমাদের ছেলেবেলার স্মৃতির মধ্যে বোধ হয় জ্যোতীকাকামশায়ের এমন কর্ম আর করব না (প্রথম প্রকাশ ১৮৭৭) এর পরে আসে। নাটকটির নাম পরে বদলে হয় অলীকবাবু। এটিও অনেকবার অভিনীত হয়েছে। কিন্তু হয়তো স্মৃতির জাতুবশত এর যে অভিনয়টি আমাদের সবচেয়ে সেরা মনে হয় তার পাত্রপাত্রী এরকম ছিল—

সত্যসিদ্ধু	জ্যাঠামশায়, দ্বিজেন্দ্রনাথ
অলীকবাবু	রবিকাকা
গদাধর	সেঙ্গুপিসেমশায়
জগদীশ	জগদীশদাদা
হেমাজিনী	শরৎকুমারী চৌধুরানী
পিসিনি	বর্ণপিসিমা

কী স্বাভাবিক অভিনয় করতেন বর্ণপিসিমা। এখনও মনে পড়ে, প্রথম দৃশ্বে তিনি দাসীদের মত মাটিতে বসে হাঁটু তুলে হাতের উপর মাথা রেখে

সকালবেলা বসে আছেন আর বাইরে থেকে গদাধর দরজা ঠেলতেই মাথা তুলে বলে উঠলেন, ‘দরজা ঠেলে কে ও? ওমা, গদাধরবাবু যে। বড়মানুষের মোসাহেব, দশটা বাজতে-না-বাজতেই ঘুম ভাঙল?’ তার পরের দৃশ্যে অলীকবাবু ও সত্যসিদ্ধু স্টেজে ঢুকছেন। ঢুকতে ঢুকতে অলীকবাবু বলছেন, ‘আজ্ঞে ই্যা মশায়, কামাখ্যাদেশের রাজকন্ঠা, আমার সঙ্গে বিয়ে দেবার জন্তে ঝুলোঝুলি।’ সেই ভাব ও কথা এখনও যেন কানে বাজছে। তার পর বন্ধু সেজে অরুদাদার গান, তারই বা কী কায়দা! আর জ্যোতীকাকার সেই চীনেম্যান সেজে চীনেভাষায় কিচিরমিচির কথা—কাকে ছেড়ে কার কথা বলব! হেমাজিনী যে হাতে ঝুটি ধরে ‘এই বন্দীই আমার প্রাণেশ্বর’ এইরকম কী একটা খুব নাটকীয় ভাবে বলতেন, সেও একটা মনে রাখবার মত জিনিস।

বিবাহ-উৎসব

বিবাহ-উৎসব নামে আর-একটি ঘরোয়া গীতিনাটক আমাদের সময়ে চলিত ছিল। নামেই তার বিষয়বস্তুর প্রকাশ। আমার পিসতুতো বোন সুপ্রভাদিদির বিবাহের সময়ে, মনে পড়ে, পুজোর দালান থেকে বরকনে দোতলার বাসরে পৌছবার আগেই কনের হল ফিট। তখন বাড়িতে কি জানি কেন হিষ্টিরিয়া রোগটির প্রাচুর্য্য হইয়াছিল। আমি আর উষাদিদি কোনোরকম করে সেই মূর্ছিত কনেকে দুদিক থেকে ধরে অতিকষ্টে সিঁড়ি ভেঙে দোতলার বাসরঘরে এনে ফেললুম। সেখানে তিনি মছলন্দে অজ্ঞান অবস্থায় শুয়ে রইলেন, পাশে ববু সুকুমার হালদার হতভম্ব হয়ে বসে কি মনে করছিলেন তা তিনিই জানেন। এই অবস্থায় আমাদের সেই ‘বিবাহ-উৎসব’ অভিনীত হয়। দিহুর মা সুশীলাবউঠান নায়ক সেজেছিলেন। তিনি গান এবং অভিনয় দুইই সুন্দর করতেন। তাঁর একটি গান ‘ও কেন চুরি করে যায়’ তখন খুব জনপ্রিয় হয়েছিল। নায়িকাকে দেখে মোহিত হয়ে তিনি গাইতেন, ‘ওই জানালার পাশে বসে আছে করতলে রাখি মাথা’। সে গানটির একাল পর্যন্ত পৌছবার সৌভাগ্য হয়েছে। তার উত্তরে সরলাদিদি সখা সেজে তাঁর মোহভঞ্নের উদ্দেশ্যে যে গান করতেন ‘তুমি আছ কোন্ পাড়া’ সেটিও প্রাথমিক হাসির গানের মধ্যে স্থান পাবার যোগ্য—

তুমি আছ কোন্ পাড়া তোমার পাই নে যে সাড়া
পথের মধ্যে হাঁ করে যে রৈলে হে খাড়া ।

...

রাঙা অধর নয়ন কালো ভরা পেটেই লাগে ভালো
এখন পেটের মধ্যে নাড়িগুলো দিয়েছে তাড়া ।
এই স্বরেই আবার পরে 'আঃ বেঁচেছি এখন' গানটি রচিত হয় ।

বান্ধীকিপ্রতিভা ও কালমুগয়া : পুনশ্চ

গগনদাদা খুব ভালো অভিনয় করতেন বলে দস্যু রত্নাকর যখন বান্ধীকিতে পরিণত হলেন তাঁর তখনকার মনোভাবের উপযুক্ত এক নতুন সঙ্গীর প্রবর্তন করে রবিকাকা গগনদাদাকে সেই ভূমিকা দিলেন । এখন 'এ কেমন হল মন আমার' করুণ গানটি গাইতে গাইতে দিহু গগনদাদার কাঁধে হাত দিয়ে নিজেরই ভাবে এমন অভিভূত হয়ে পড়ল যে, সেও যেমন কাঁদে গগনদাদাও তেমনি কাঁদেন । অভিনয় করতে করতে ভূমিকার সঙ্গে অভিনেতা যদি একেবারে অভিন্নহৃদয় হয়ে পড়েন তবে তো অভিনয় করা মুশকিল হয় ।

আমার ব্যক্তিগত স্মৃতিকথা হিসাবে বলি, আমি ও উবাদিদি কালমুগয়ায় বনদেবী সঙ্গে 'সমুখেতে বহিছে তটিনী' গানটিতে এক জায়গায় বসে ডান হাতের ভঙ্গিতে সামনের দিকে কেমন তটিনী বয়ে যাচ্ছে আর দু' আঙুল উপরে তুলে 'দুটি তারা আকাশে ফুটিয়া' দেখাতাম। সে গল্প করে সেদিন পর্যন্ত কত মেয়েদের হাসিয়েছি । আগে কোনো ইংরিজী লেখায় বলেছি 'Either on or off the stage' আমি কখনোই ভালো অভিনয় করতে পারি নে ।

রাজা ও রানী

রাজা ও রানী (প্রথম প্রকাশ ১৮৮২) নাটক বহুব্যয় অভিনীত হয়েছে, তার মধ্যে প্রথম অভিনয়ের একটু বৈশিষ্ট্য আছে। কলকাতার সেন্ট পল্‌স ক্যাথিড্রালের লাগাও জমিতে তখন একটি বিরাট পুকুর ছিল। তাকে লোকে বলত বিজ্জিতলাও। তারই সামনে বর্তমান প্রেসিডেন্সি হাসপাতালের জমিতে বিজ্জি-রাজার একটি পুরনো বাড়ি আমরা ভাড়া নিয়ে বহুদিন ছিলুম। বাড়িটি জীর্ণ হলেও তার সঙ্গে আমাদের সেকালের অনেক স্মৃতি জড়িত। তারই

একতলায় চওড়া বারান্দায় স্টেজ বেঁধে প্রথম রাজা ও রানীর অভিনয় হয়। তার পাত্রপাত্রী ছিল এই রকম—

বিক্রম	রবিকাকা
সুমিত্রা	মা
দেবদত্ত	বাবা
নারায়ণী	কাকিমা : মুণালিনী দেবী

মা খুব ভালো অভিনয় করেছিলেন শুনতে পাই। পরদিন বন্ধবাসী কাগজে ‘ঠাকুরবাড়ির নতুন ঠাঁট’ বলে একটি শ্লেষাত্মক প্রবন্ধ বেরল। তাতে উক্ত পাত্রপাত্রীর তালিকা এবং পরস্পরের সম্পর্ক পরিষ্কার করে লিখে দেওয়া ছিল। বলা বাহুল্য, বাবা এসব সমালোচনায় ভ্রক্ষেপও করলেন না। মনে হয় এই অভিনয়েই ‘উনি’ কুমার, এবং প্রতিভাদিদি ইলা সেজেছিলেন।

মায়ার খেলা

মায়ার খেলার একটি অভিনয় এই বিজিতলার বাড়ির বারান্দাতেই হয়েছিল, তার বিশেষত্ব এই ছিল যে, মায়াকুমারীদের অভাবে রবিকাকা জ্যোতিকা বসন্ত ও মদন সেজে তাদের গান গেয়েছিলেন। আমি এইবার শাস্তা সেজেছিলুম।

মায়ার খেলার নাম করতে গেলে অনেক কথা মনে আসে। অনেকেই জানেন যে রবিকাকা শ্রীমতী সরলা রায়ের অনুরোধে সখিসমিতির সাহায্যার্থে এই গীতিনাটিকা রচনা করেন। বেথুন কলেজের প্রশস্ত আঙিনায় এর প্রথম অভিনয় হয়, আমাদের বাড়ির মেয়েরাই অভিনয় করেন। সখাদের বেশ ছিল, খুব টকটকে রঙের সাটিনের পাঞ্জাবি ও ধুতি, তার সঙ্গে ঝেং গৌফের রেখা। আর মায়াকুমারীদের হাতের দণ্ডের মুণ্ডে ইলেকট্রিক আলো জ্বলছিল আর নিবছিল, বোধ হয় বিলিভী পরীর অহুঙ্করণে। তখন সব বিষয়ে বিলিভী অহুঙ্করণটাই প্রবল ছিল। তার পরে মায়ার খেলা কত উপলক্ষে কত ভিন্ন দল দ্বারা অভিনীত হয়েছে এবং এখনও হচ্ছে, তবু সে প্রথমের মোহ কাটে না। এখনও মনে পড়ে আমাদের পার্ক স্ট্রীটের বাড়ির তেতলার ঘরে রবিকাকা একটা একহারা খাটে উপুড় হয়ে পড়ে বুকে বালিশ দিয়ে স্নেটের, উপর মায়ার খেলার গান লিখছেন এবং গুনগুন করে স্বর দিচ্ছেন। সে সময়ে কিছু দিনের জন্ত তিনি কাকিমা ও বেলাকে নিয়ে আমাদের ওখানে এসে ছিলেন। তখন

ওঁরা দার্জিলিং থেকে ফিরে এসেছেন এবং আমাকে আনতে লরেটো স্কুলে যে গাড়ি যেত তাতে বেলাকে পাঠিয়ে দিয়েছিলেন— আমি কখনও ভুলব না যে গাড়িতে উঠতে গিয়ে, সেই আপেল ফলের মত রাঙা টুকটুকে গাল ও কৌকড়া চুল-ওয়ালা পুতুলটিকে হঠাৎ দেখে আমার কি অপ্রত্যাশিত আনন্দই না হয়েছিল। পরবর্তীকালে সরলাদিদি-সম্পাদিত ভারতীর সাহায্যার্থে রবিকাকার নির্দেশে জোড়াসাঁকোর বাড়ির লোকেরা অভিনয় করে টাকা তুলে দেন। তার মধ্যে অমিয়া-বউমা প্রমদা সঙ্গে খুব সুন্দর অভিনয় ও গান করেন। এই প্রসঙ্গে আমার মনে হয় যে, মায়ার খেলার বিষয়বস্তুটি— অর্থাৎ নায়ক যে শাস্ত্র ভালোবাসা প্রথমজীবন থেকে তাঁর বাল্যসঙ্গিনীর কাছ থেকে পেয়ে এসেছেন তার মর্যাদা বুঝতে না পেরে তাঁর মানসীর সন্ধানে বেরিয়ে পড়ে এক হাস্যোচ্ছল লীলাময়ী নায়িকার রূপে মোহিত হয়ে এবং সেখানে প্রত্যাখ্যাত হয়ে আবার সেই বাল্যসঙ্গিনীর আশ্রয়ে শাস্ত্র লাভ করেন— রবিকাকা তাঁর নানা কাব্য-নাটকে ব্যবহার করেছেন। কবিকাহিনী, ভগ্নহৃদয়, নলিনী, মায়ার খেলা প্রভৃতিতে এই ঘটনাই পাওয়া যায়।

আমাদের বাড়িতে এত নাটক অভিনয় হত যে বাইরে নাটক দেখতে যাবার রেওয়াজ ছিল না; কেবল একবার স্টার থিয়েটারে রাজা বসন্তরায় নামে বউঠাকুরানীর হাটের রূপান্তর দেখতে গিয়ে বুড়ো বসন্তরায়ের গান ও অভিনয়ে খুব কৈদেছিলুম মনে পড়ে।

রূপসজ্জা ও মঞ্চসজ্জা

আগেই বলেছি আমাদের রূপসজ্জা মঞ্চসজ্জা অনেকটা বিলিতি অঙ্করণে হত। হ. চ. হ.— হরিশচন্দ্র হালদার আমাদের দৃশ্যপটগুলি অতি নিকৃষ্ট বিলিতি অঙ্করণে আঁকতেন। বাস্তবের যথাসাধ্য অঙ্করণ করাই ছিল তখনকার আদর্শ। বাস্তবিকপ্রতিভার অভিনয়ে দিহুর ঘোড়া নিয়ে স্টেজে ঢোকা, আর ‘রিমঝিম’ গানের সঙ্গে অরুণদাদার টিনের নল ফুটো করে বৃষ্টি নামানোর কথা অবনদাদা তো বলেইছেন। বাইরের থিয়েটারে আমরা কম গেলেও স্টার থিয়েটারে নল-দময়ন্তীর অভিনয়ে এক-একটা ‘উইং’এর গায়ে এক-একজন পরী গোলাপী মোজা পরে কাগজের পদ্মাসনে ত্রিভঙ্গীমূর্তি হয়ে দাঁড়িয়ে আছে মনে পড়ে।

পরবর্তীকালে আমাদের চোখের সামনেই অবশ্য শিশিরকুমার ভাট্টা প্রমুখ

বিখ্যাত নটপ্রধানগণকেও বিলিতি নকল ছেড়ে মঞ্চসজ্জায় ভারতশিল্পের প্রবর্তন করতে দেখেছি। মণিলালেরও শুনেছি সখীদের নাচের পোশাকে নতুন ঢঙ প্রবর্তনে অনেকটা হাত ছিল।

পূর্বেই বলেছি ঠাকুরবাড়িতেও মঞ্চসজ্জায় প্রথম দিকে বিলিতি অনুকরণই চলত। রবিকাকার বাগ্মীকি সাজে গিঠের দিকে যে লম্বা জোকা মত ঝুলিয়ে দেওয়া হয়েছিল, তাতে বিলিতি রাজারাজড়াদের mantleএর আভাস পাওয়া যায়। তার সঙ্গে রুদ্রাক্ষের মালা। অবশ্য রবিকাকা যাই পরতেন তাই মানাত, সে আলাদা কথা। তিনি যখন ঐ সাজে বাগ্মীকি রূপে তাঁর সেই স্বকণ্ঠে তারসপ্তকে অভিনয়পূর্বক রামপ্রসাদী সুরে গাইতেন ‘শ্রামা, এবার ছেড়ে চলেছি মা’ তখন যে সেখানে কি অপরূপ আবহাওয়ার সৃষ্টি হত তা যারা না দেখেছে না শুনেছে তাদের বোঝানো শক্ত।

তখনকার ডাকাতদের কাবুলিওয়াল-সাজে কেন সাজানো হত বলতে পারি নে। সম্ভবত তাদের ইয়া গৌফ এবং ইয়া পাগড়ির সমাবেশে ডাকাতের ভীতিজনক রূপ সহজেই ফুটে উঠত। তার পরে আবার মধ্যযুগে তাদের ধুতি, ফতুয়া, হয়তো মাথায় একটা ফেটি বাঁধা, এই সাধারণ বেশ পরানো হত। অবশ্য রক্তমঞ্চের উপযুক্ত একটু রঙ চড়িয়ে। লক্ষ্মী-সরস্বতীকে তো মামুলি পৌরাণিক রীতি অনুসারে লাল ও সাদা জরির বেশে সাজানো হত। বাড়ির মেয়েরাই বনদেবীদের সেলাই-করা জামা পরিয়ে একটি নানা-রঙের শাড়ি ইচ্ছামত জড়িয়ে দিতেন। আর লতাপাতা এবং এলোচুলে ফুল ইত্যাদি দিয়ে বনদেবীদের উপযোগী সাজ করে দিতেন।

আমার ইচ্ছে করে রবিকাকার সংগীতের ধারাবাহিক বিকাশের বিবরণ যেরকম একপ্রকার বাঁধাধরা হয়ে গেছে এবং অনেক জায়গায় উদাহরণ দিয়ে দেখানো হয়ে থাকে তেমনি তাঁর নাট্যসজ্জার বিবরণও কালানুসারে উদাহরণ দিয়ে দেখানো হয়। একই নাটক, যথা, বাগ্মীকিপ্রতিভার আশ্রয় মধ্য ও অন্ত-রূপের সজ্জা দেখাতে পারলে আমার এই ইচ্ছাটি সহজেই পূরণ হয়।

তখনকার কালে আমাদের অভিনয়ে এত নাচের চল ছিল না। নৃত্যনাট্য দুই থাকুক, অতি সামান্য ভাবেও কোনো বিশেষ প্রচলিত নৃত্যধারাও শিক্ষা দেবার

কোনোরকম কল্পনাই কারো মাথায় আসে নি। বনদেবীদের ‘রিমঝিম’ প্রভৃতি গানের সঙ্গে নৃত্যে অতি প্রাথমিক ড্রিলএর মত একপ্রকার নাচ শেখানো হত, যা দেখে এখনকার নৃত্যপটীয়সীরা বোধ হয় তাচ্ছিল্যের হাসি হাসবেন। ডাকাতদের ‘কালী কালী বলো রে আজ’এর সঙ্গে মাথার উপর উঁচু করে ধরে টিনের তলোয়ার দিয়ে তালে তালে টুকে পা ফেলে যে নাচের অঙ্কুরণ করা হত, তাকে কোনদেশী বলা যায় ঠিক জানি নে। আমার, কেন জানি নে, বিলেতে কোনো পল্টনের সাহেব-মেমদের বিয়ের সময় দু পাশ থেকে তুলে ধরা যে তলোয়ারের খিলেনের তলা দিয়ে আসতে হয়, সে দৃশ্যের কথা মনে আসে। কিন্তু সম্ভবত আমাদের দেশের লাঠিখেলার সঙ্গে কিছু যোগ আছে। ‘এত রক্ত শিখেছ’ গানের সঙ্গে ঢোলক বাজাতে বাজাতে নাচতে নাচতে রক্তমঞ্চে লাফানোকে কতকটা স্বাভাবিক আনন্দবিকাশের একটা ভঙ্গি মাত্র বলা যেতে পারে। তবে এইসব নাচের মধ্যেই বোধ হয় রবিকাকার পরবর্তী নৃত্যকলা-বিকাশের অঙ্কুর নিহিত। হয়তো পূর্বসংস্কারবশতই আমি অনেক সময়ে বলে থাকি যে, এই নৃত্যকলা অভিনয়কলার গলা টিপে মারছে। অভিনয়কলা মুখের ভাব ও কণ্ঠস্বরের উপর বেশি নির্ভর করে, আর নৃত্যকলা হয়তো স্বচ্ছন্দ নৃত্য-ভঙ্গির উপর বেশি নির্ভর করে। সকলেই জানানেন, রবিকাকা গগনদাদা আর দিহু ঠাকুরবাড়ির শ্রেষ্ঠ অভিনেতা ছিলেন। অবনদাদারও হাশুরসের অভিনয়ে বিশেষ ক্ষমতা ছিল। সেজন্ত আমার ভয় হয়, পাছে বর্তমানে নৃত্যকলা সেই অভিনয়ের ধারা ব্যাহত করে। অবশ্য ভাবপ্রকাশ নিয়েই কথা, এবং নৃত্যও যে কলার একটি বাহন সে কথা স্বীকার না করে আমি নিজেকে নিতান্ত সেকেলে প্রতিপন্ন করতে চাই নে।

ফাস্তুনী

নাচের কথা যখন উঠলই তখন ফাস্তুনী (প্রথম প্রকাশ ১৯১৬) সম্বন্ধে যেটুকু শ্রুতি আছে বলি। তার প্রথম অভিনয় জোড়াসাঁকোর বাড়িতে হয়। নদী চাঁপাবন বেগু প্রভৃতি প্রাকৃতিক প্রতীকের যে মানবীয় রূপ দেওয়া হয়েছিল, তার মধ্যে আমার ভাইঝি মঞ্জু প্রভৃতি ছোটমেয়েদের তত্ত্বাবধান করবার কিছুটা ভার আমার উপর পড়েছিল। আগেই বলেছি, নৃত্যকলার স্রষ্টা পদ্ধতি তখনও গড়ে ওঠে নি। তার উপর আমি তো এসব বিষয়ে নিতান্তই অজ্ঞ

ছিলুম। তবু রবিকাকার অতুরোধে যেটুকু পারি ছোটদের পরিচালনা ও পদচালনা করার চেষ্টা করেছিলুম। এ কথা উল্লেখ করছি শুধু জানানাবার জন্তে যে, পরে রবিকাকা এই নাচকে ‘তোদের ডায়োসিশনের নাচ’ বলে একটু খোঁটা দিয়েছিলেন। তাতে আমার গায়ে কিছু লাগে নি, কারণ আমি কোনোদিন ডায়োসিশনের ছাত্রী ছিলাম না। এখনও মনে আছে, মেয়েদের মাথার মাঝখানে উঁচু ঝুঁটি করে দিয়েছিলুম, যেমন আজও করে থাকে দেখতে পাই। ‘নদী আপন বেগে’র সময় মঞ্চের এক দিকে সজীব আর-এক দিকে নিখিল দাঁড়িয়ে একটা নীল কাপড়কে টেউ খেলিয়ে নদীর বেগ প্রকাশ করছিল, তাতে সেই পুরনো বাস্তবের নকলের কথাই মনে পড়ে। কিন্তু সব চেয়ে সুন্দর লেগেছিল, দশ বছরের ছেলে সমরেশ সিংহের ফুলের দোলনায় তুলতে তুলতে ‘ওগো দখিন-হাওয়া’ গানটি গাওয়া; এ দৃশ্য যারা দেখেছে শুনেছে কখনও ভুলতে পারবে না।

অবনদাদার মঞ্চসজ্জার কথাও উল্লেখযোগ্য। আগেকার কালের সেই বিসদৃশ বিদেশী নকল তুলে দিয়ে তার জায়গায় পিছনে একটি নীল পশ্চাৎপট দিয়েছিলেন, সেটি এখনও দেওয়া হয়। তার উপর কেবলমাত্র একটি গাছের ডাল, তার ডগায় একটি মাত্র লাল ফুল এবং তার উপরে একটি ক্ষীণ চন্দ্ররেখা। রথী দিহু গুঁরা নিজে টিকিট বিক্রি করে বোধ হয় দশ-বারো হাজার টাকা তুলেছিলেন, ঠিক কত আমার মনে নেই, কিন্তু তখনকার পক্ষে বেশ ভারী অঙ্ক। অভিনয়ান্তে যখন আমরা উঠোন ছেড়ে দোতলায় উঠলুম এবং দুই বাড়ির মাঝখানে নাম-সার্থক-করা সাঁকোয় দাঁড়িয়ে আছি তখন রবিকাকাকে লক্ষ্য করে বললুম যে তোলা টাকাটা যেন ঠিক হাতে গিয়ে পৌছয়। তার উত্তরে তিনি ফাস্তুনীর মাঝির একটি কথা উদ্ধৃত করে বললেন, ‘আমার দোড় ঘাট পর্যন্ত, ঘর পর্যন্ত না।’ আমাদের অভিনেতা প্রভৃতি সকলকে দোতলার বাইরের ঘরে ভোজ খাওয়ানো হল।

ডাকঘর

ডাকঘরটিও (প্রথম প্রকাশ ১৯১২) মধ্যপর্বের অন্তর্গত বলে মনে করি। এমন সুন্দর মঞ্চসজ্জা অন্তত আমাদের চোখে তার আগে কখনও পড়ে নি। তখনকার ‘বিচিত্রা’ঘরের শেষে মঞ্চটি বাঁধা হয়, ঠিক একটি পল্লীগ্রামের মধ্যবিত্ত

গৃহস্থের ঘর অহু করণ করে। সেই চালের খড় পর্ষস্ত স্টেজের সামনে থেকে বার করে দেওয়া হয়েছিল। ঐ ঘরেই ভিন্ন ভিন্ন উপলক্ষ্যে কাছাকাছি ছয় বার এই নাটকটি অভিনীত হয়। আমার চোখে ঘরটি এত সুন্দর লেগেছিল যে মনে হয়েছিল কখনও ঘরটি না ভাঙলেই ভালো হয়। তার অভিনেতাদের মধ্যে ছিলেন রবিকাকা গগনদাদা সমরদাদা অবনদাদা এবং অবনদাদার ছোট-মেয়ে সুরূপা। আর অমল সেজেছিলেন আশামুকুল নামে একটি শান্তিনিকেতনের ছেলে; বহুদিন পরে বিশ্বভারতী পত্রিকায় সে একটি লম্বা কবিতা লিখে অভিনেতাদের প্রত্যেকের খবর নিয়েছিল। ডাকঘরের অভিনয়ের সুন্দর ছবি তোলা আছে। অবনদাদার অপূর্ব লেখনীতে ছবির চেয়েও উজ্জ্বল বর্ণনা পাওয়া যায়।

বিবিধ

বশীকরণ, লক্ষ্মীর পরীক্ষা, গান্ধারীর আবেদনও আমাদের কালে অভিনীত হয়েছিল মনে আছে, এবং তাদের সম্বন্ধে ছোটখাটো স্মৃতিও যে ভেসে না আসে তা নয়, তবে রবিকাকার সঙ্গে তার বিশেষ যোগ নেই। হয় রবিকাকা কিংবা দিহু পরিচালনা না করলে কোনো নাটক করাই আমাদের সার্থক হত না। একবার আমার বড়ভাত্তরের প্ররোচনায় প্রথম মহাযুদ্ধের সাহায্যার্থে আমরা নিজেরা বাল্মীকিপ্রতিভা করবার চেষ্টা করি। তবু রবিকাকাকে অন্তত একবার দেখিয়ে আমাদের ভ্রম সংশোধন করবার সুযোগ লাভ করেছিলুম। সেবার বনদেবীদের সব সবুজ রঙের পোশাক ও লতাপাতা দিয়ে সাজিয়ে সেই পুরনো বাস্তব নকলের পরিচয়ই দিয়েছিলুম। ‘সহে না সহে না’ গানটিতে আমরা যেরকম ভাবে বনদেবীদের দলবদ্ধ করে মঞ্চের উপর ইতস্তত বসিয়েছিলুম, তিনি সে পরিকল্পনা বদলে বলে দিলেন, গানটি তাদের মনের আবেগ প্রকাশের উপযোগী করে চড়া করে গাইলে ভালো হয়।

এর পরে, আমি যাকে ‘শান্তি’পর্ব বলেছি তখন, অর্থাৎ রবিকাকার শান্তিনিকেতনে স্থায়ীভাবে বাসকালে তাঁর যেসব নাটক রচিত ও অভিনীত হয়েছিল তার সঙ্গে আমার তেমন ঘনিষ্ঠ পরিচয় নেই। তবে ১৯৪১ সালের একেবারে শেষে যখন শান্তিনিকেতনের ভাঙাঘাটে স্থায়ীরূপে বাস করতে আসি তখন দুটি

পুরনো গীতিনাটিকাকে উদ্ধার করায় আমার কিছু হাত ছিল— কালযুগয়া আর ভাহুসিংহের পদাবলী। ভাহুসিংহের পদাবলীর যে অল্পসংখ্যক গান জানতুম, সেগুলিকে সাজিয়ে নাট্যরূপ দিয়েছিলুম। এখন এই আকারেই নাটিকাটি অভিনীত হয়। কালযুগয়ার গানও পুরনো ভারতী থেকে আমার মেধাবী ছাত্রী সৃষ্টিত্রাকে দিয়ে লিপ্যন্তরিত করেছিলুম। দুঃখের বিষয়, অনেক সাধ্যসাধনা করেও মগ্নচৈতন্য থেকে সব গানগুলির স্মরণ উদ্ধার করতে পারি নি, তবে অধিকাংশই করেছি।

সাহিত্যস্মৃতি

যেমন গান ও নাটকের বিষয় তেমনি রবীন্দ্রসাহিত্যস্মৃতিও আমাদের ছেলেবেলা থেকে আরম্ভ করতে হয়। ছোটবেলা থেকেই রবিকাকা আমাদের ইংরেজী থেকে বাংলা তর্জমা করতে দিতেন মনে পড়ে। এক কথায় বলতে গেলে এসব বিষয়ে তিনি আমাদের পরামর্শদাতা ও উৎসাহদাতা ছিলেন। আমার যখন আন্দাজ ন' বছর বয়স তখন থেকেই অক্ষয় চৌধুরীকে কবিতায় চিঠি লিখতুম, সেগুলি এখন থাকলে কোতূকের বিষয় হত। আমাদের একটি পারিবারিক খাতা ছিল যেটি পূর্বোক্ত ভবানীপুরের বাড়িতে সিঁড়ির উপরে একটি উঁচু ডেস্কের উপর শেকল দিয়ে বাঁধা থাকত। যার যখন ইচ্ছে তাতে নিজের বক্তব্য লিখে রাখত। তার মধ্যে রবিকাকার নিজের হাতে কতগুলি নিয়ম লেখা ছিল, যেমন, তার কোনো রচনা বাইরে প্রকাশিত হবে না, ইত্যাদি। এরকম দুখানি খাতা পরপর ছিল, কিন্তু দুঃখের বিষয় দ্বিতীয়টির কোনো সন্ধান পাওয়া যায় নি। প্রথমটি রথীর পঞ্চাশতম জন্মদিনে তাকে উপহার দিই, এখন সেটি সম্বন্ধে রবীন্দ্রসদনে রক্ষিত আছে। রবিকাকার স্বহস্তে লিখিত নিয়মাবলীর মধ্যে ছাপার নিষেধটি পরে অবশ্য রক্ষিত হয় নি। আর প্রকাশ করে ভালোই হয়েছে কারণ হাতের অক্ষরের চেয়ে ছাপার অক্ষর অপেক্ষাকৃত স্থায়ী। তা ছাড়া এ লেখার সবগুলির না হোক অনেকগুলির ঐতিহাসিক ও সাহিত্যিক মূল্য আছে। আমাদের আত্মীয়বন্ধু অনেকে অনেক ছেলেমানুষি লেখা এতে লিখে গেছেন, কিন্তু আশ্চর্যের বিষয় আমি এতে কখনও কিছু লিখি নি।

রবিকাকা আমাকে উদ্দেশ্য করে কবিতায় যেসব পত্র লিখেছিলেন কড়ি ও কোমলের প্রথম সংস্করণে (১২৯৩) সেগুলি বেরিয়েছিল। তার তিনটি এখনো কড়ি ও কোমলে ছাপা হয়। আমার ক্ষুদ্র বিবেচনায় মনে হয় এই তিনটিই কাব্যরত্ন-বিশেষ, আর আমার সঙ্গে তার যোগ স্মরণ করে বিশেষ গৌরব অনুভব করি। আমার জন্মদিনে একটি সুন্দর পিয়ানোর মত গড়নের দোয়াতদানি উপহার দিয়ে তার সঙ্গে যে কয়েক ছত্র লিখেছিলেন সেও তাঁর

হাতের স্পর্শে উজ্জ্বল, এটিও কড়ি ও কোমলের প্রথম সংস্করণে ছিল—

স্নেহ যদি কাছে রেখে যাওয়া যেত

চোখে যদি দেখা যেত রে,

বাজারে-জিনিস কিনে নিয়ে এসে

বল্ দেখি দিত কে তোরে ।...

প্রভাতসঙ্গীত (১২৯০) আমাকে ‘স্নেহ উপহার’ দিয়ে উৎসর্গপত্রে আমার উদ্দেশে একটি কবিতা লিখেছিলেন, প্রথম সংস্করণের বইতে সেটি আছে ।

আমি আর-একটু বড় হলে আমাকে লেখা তাঁর চিঠিগুলি সাহিত্যস্মৃতির একটি বিশেষ স্থান অধিকার করে । ‘ছিন্নপত্র’ নামে সেগুলি তাঁর গল্প-সাহিত্যে স্থায়ী আসন অর্জন করেছে । এই চিঠিগুলির উপলক্ষ হওয়া ছাড়া আমার এই সামান্য কৃতিত্বটুকু আছে যে, সেই অল্পবয়সেই তার মর্যাদা বুঝে তার সাহিত্যিক অংশগুলি সাধারণ পারিবারিক অংশ থেকে বিচ্ছিন্ন করে একটি খাতায় তারিখসমেত লিখে রেখেছিলুম, পরে সেই খাতা তাঁকেই দিয়েছিলুম । সেই খাতা থেকেই ছিন্নপত্র বইখানি ছাপানো হয় ।

রবিকাকার কতকগুলি বইয়ের পাণ্ডুলিপি আমার কাছে ছিল— ভগ্নহৃদয়, নলিনী ইত্যাদি । সেগুলি এখন রবীন্দ্রসদনেই আছে । গত শতাব্দীর শেষ শতকে বিলেতে যাবার সময় ও প্রবাসকালে যে ডায়েরি লিখেছিলেন, তারও নিজের হাতে পেনসিলে লেখা খাতা আমার কাছে ছিল । সেটিও যথারীতি রবীন্দ্রসদনে দিয়েছি । ‘যুরোপযাত্রীর ডায়ারির খসড়া’ নামে সেটি বিশ্বভারতী পত্রিকায় (১৩৫৬-৫৭) মুদ্রিত হয়েছে । এই খসড়ারই সংশোধিত রূপ যুরোপযাত্রীর ডায়ারি দ্বিতীয় খণ্ড (১৩০০) নামে প্রকাশিত হয়েছিল ।

ছেলেবেলায় আমি আর স্বরেন রবিকাকার একটি বিশেষ জন্মদিনে একটি খাতায় আমাদের প্রিয় ইংরেজ কবিদের বিখ্যাত কবিতাগুলি নকল করে তাঁকে উপহার দিয়েছিলাম । তার নকলের অংশটা আমার হাতের লেখা, কিন্তু প্রত্যেক পৃষ্ঠায় যে সোয়াইকলমের নকশা করা আছে সেটি আমার দাদার হাতের কারিগরি । তাঁর প্রতি আমাদের ভাইবোনের ভক্তি ও ভালোবাসার নিদর্শন হিসেবে এই খাতাটি কোতুলী ধারা তাঁরা শান্তিনিকেতনে রবীন্দ্রসদনে দেখতে পারেন । -সে যুগের ইংরেজী সাহিত্যের প্রতি তখন আমাদের নিষ্ঠা, আর শিক্ষাদানের ব্যাপারে রবিকাকার প্রবল উৎসাহের পরিচয় এতে পাওয়া যাবে,

কারণ রবীন্দ্রসদনে পৌছবার বহু আগে খাতাখানি যখন তাঁর কাছে ছিল তখন তিনি রথীকে দিয়ে আমাদের সংকলনের ধারাবাহিকতা রক্ষার জন্ত পরবর্তী কবিদের রচনা তাতে নকল করাতে আরম্ভ করেছিলেন। বস্তুত তাঁর সাহচর্য ও সান্নিধ্যের ফলে আমরা বাড়িতে সর্বদাই একটি সাহিত্যের আবহাওয়ায় মাতুষ হয়েছি। স্বপ্নের এক জন্মদিনে তিনি হার্বার্ট স্পেনসারের সমগ্র রচনাবলী তাকে উপহার দিয়েছিলেন। আমি লরেটো ইস্কুলে ফরাসী শিখতুম বলে, একবার আমার জন্মদিনে ইস্কুল থেকে ফিরে এসে দেখি টেবিলের উপর তখনকার দিনের বিখ্যাত ফরাসী কবি কপ্তে, মেরিমে, ল্য কঁৎদলীল, লা ফঁতেন্ প্রভৃতির রচনাবলী সুন্দর করে বাঁধিয়ে সোনার জলে তাদের নাম ও আমার নাম লিখিয়ে সাজিয়ে রেখেছিলেন। দেখে যে কত আনন্দ হয়েছিল বলা যায় না। এখনো সেই বইগুলি শান্তিনিকেতনের কেন্দ্রীয় গ্রন্থাগারের শোভাবর্ধন করছে।

জীবনে অনেক ভালো জিনিস পেয়েছি যা রাখতে পারি নি। তাই বিশেষ করে এটুকু বলে যেতে চাই যে, একমাত্র বইয়ের ক্ষেত্রে সে নিয়মের ব্যতিক্রম হয়েছে। ওঁর সমস্ত ফরাসী গ্রন্থ কাশী বিশ্ববিদ্যালয়কে, আর ক্রমশ সমস্ত সংস্কৃত বাংলা ইংরেজী বই বিশ্বভারতী কেন্দ্রীয় গ্রন্থাগারে দান করা হয়। পরে শুনেছি সে বইগুলি শান্তিনিকেতনে পৌছলে রবিকাকা নাকি খুব খুশি হয়ে অনেকদিন নিজের ঘরে রেখেছিলেন।

ছেলেবেলায়ও আমাদের তিনি সে বয়সের উপযুক্ত ইংরেজী বই জুগিয়েছেন। ‘Hellen’s Babies’ (রচয়িতা বিন্মত) নামের একটি ছোটদের বই নিজে পড়ে শোনাতেন। Lewis Carroll-এর *Alice in Wonderland* আর *Through the Looking Glass* এর মত অপূর্ব ছোটদের বই আজ পর্যন্ত আমার হাতে আসে নি। সেইজন্তই বলি, আজকাল যে নীচু ক্লাসে ইংরেজী ভাষা বাতিল করে দেবার প্রস্তাব উঠেছে সেটা কাজে পরিণত হলে আমাদের শিশুদের আমি ‘কৃপাপাত্র অতিদীন’ বলে মনে করব।

আর-একটু বড় হলে আমরা গুরুজনদের সঙ্গে সাধারণভাবে অনেকগুলি ইংরেজ লেখকের বই সমানে পড়ে উপভোগ করেছি। Marie Bashkirtscheff এর জার্নাল আর এমিয়েলের জার্নাল বোধ হয় তার মধ্যে ছিল। উপন্যাসের মধ্যে মারি করেলি, Onida, জর্জ এলিয়েটও আমাদের

পঠনীয় পুস্তকের তালিকায় ছিল। ডিকেন্স, থ্যাকারে, স্কট অবশ্য লাইব্রেরি সাজানোর কাজ করেছে। তবে ব্যক্তিগতভাবে এঁদের দুই-একটা বই ছাড়া বেশি পড়েছি বলে মনে পড়ে না। এডগার এলেন পো'র সঙ্গে রবিকাকাই আমাদের প্রথম পরিচয় করিয়ে দেন। তাঁর বইয়ের একটি মোটা সংস্করণের চেহারা এখনও পরিষ্কার মনে পড়ে। তাঁর গল্পপত্রের বিশেষত্ব এখনো মনে লেগে রয়েছে। তাঁর গল্পের মধ্যে কি-একটা রহস্যময়তা ছিল। বিশেষত তাঁর *The Raven* নামের অপূর্ব কবিতাটি ছন্দ মিল ও ভাবের জ্ঞাত এই বৃদ্ধ-বয়সেও স্মৃতির দুয়ারে মাঝে মাঝে আঘাত করে—

While I nodded, nearly napping,
 *suddenly there came a tapping,
 As of some one gently rapping—
 rapping at my chamber door.
 ‘ ’Tis some visitor,’ I muttered,
 ’tapping at my chamber door :
 Only this, and nothing more.’
 Ah, distinctly I remember it was in
 the bleak December,
 And each separate dying ember wrought
 its ghost upon the floor.

এর পর একটি দীর্ঘ কবিতার প্রত্যেক কলিতে ভাষার দিক থেকে অজস্র মিল স্বর ও ছন্দের নকশাটি অব্যাহত রেখে আর ভাবের দিক থেকে সেই নির্জন শীতের রাত্রে একটি কালো পাখির আচম্কা আবির্ভাবের সঙ্গে তাঁর প্রণয়িনী লেনোরের স্মৃতি জড়িত করে কি সুন্দর রহস্যের আবহাওয়া সৃষ্টি করে কবি এই কথা-ক’টি দিয়ে শেষ করেছেন—

And the Raven, never flitting, still is sitting,
 still is sitting
 On the pallid bust of Pallas just above
 my chamber door ;
 And his eyes have all the seeming of a dēmon’s
 that is, dreaming,

And the lamplight o'er him streaming throws
his shadow on the floor ;
And my soul from out that shadow that lies
floating on the floor
Shall be lifted— nevermore !

আমার অবশ্য তখন থেকেই মাতৃ-অধিকারস্বত্বে লব্ধ একটু দুর্বলতা ছিল। তাই উইল্কি কলিন্সের 'হোয়াইট ওম্যান' পৰ্যন্ত আমার লোভনীয় মনে হত। জর্জ এলিয়ট পড়া নিয়ে একটু সামান্য ঘটনা বোধ হয় এখানে অপ্ৰাসঙ্গিক হবে না। বোম্বাই প্রদেশ বাবার কর্মক্ষেত্র ছিল বলে আমরা প্রত্যেক ছুটিতে তাঁর কাছে যেতুম। সে রকম একটি সফরের পথে সরোজিনী নাইডুর বাবা অঘোর চট্টোপাধ্যায় আমাদের গাড়িতে এসে ওঠেন। এখনও তাঁর সেই লম্বা সাদা চাপকান আর পাগড়ি-পরা হায়দরাবাদী ঢঙের বেশ, লম্বা দাড়ি আর দীর্ঘ চেহারা মনে পড়ছে। আমার তখন বছর-বারো আন্দাজ বয়স হবে। বোম্বাই-যাত্রার দীর্ঘপথে সময় কাটাবার জন্ত বই পড়াই আমার একটি প্রধান অবলম্বন ছিল। সুরেন জানলায় মুখ বের করে চোখে কয়লা ঢোকা সঙ্কে ও বাইরের দৃশ্য দেখতে ভালোবাসতেন। অঘোরবাবু জিজ্ঞাসা করলেন কি পড়ছি। আমি জর্জ এলিয়টের 'মিল অন্দি ক্লস্' বইখানির নাম করতে তিনি কিছু বললেন না, কিন্তু তাঁর ভাব দেখে মনে হল, যেন আমার বয়সে তার মর্মগ্রহণ করতে পারার সম্ভাবনা সম্বন্ধে তিনি সন্দেহান, যেমন কেউ কেউ উলটো করে বই ধরে বোঝাতে চায় যে সে পড়ছে। তার পরে তিনি তাঁর বাক্স খুলে পুঁতির লাঠি প্রভৃতি হায়দরাবাদের কারুকাজ-করা অনেকগুলি খেলনা দুই ভাইবোনকে দিলেন। আর আমাদের কাছে গল্প করলেন যে আমার বয়সী তাঁর একটি মেয়ে বিলেতে আছে, সে খুব লেখাপড়া ভালোবাসে বলে নিজাম তাকে বৃত্তি দিয়ে পাঠিয়েছেন। এর পরে, অনেক পরে, সরোজিনীর সঙ্গে গুঁর বিলেতে দেখা হয়। কিন্তু এহ বাহ।

রবিকাকার কাব্যের সঙ্গে পরিচয় অবশ্য পূর্বোক্ত নাটকগুলি বাদ দিলে অনেক পরে আরম্ভ হয়। আমার স্বস্তরপরিবারের সঙ্গে তাঁর প্রথম পরিচয় এবং পরে কুটুম্বিতা আর ঘনিষ্ঠতার কথা অল্প বলছি। শুনেছি কড়ি ও কোমল প্রকাশের বিষয়ে পরামর্শ তিনি বড়ঠাকুরের সঙ্গে তাঁদের বাড়িতে গিয়ে

করতেন। তাঁর প্রথম রচিত কবিতাবলীর সঙ্গে যে আমাদের পরিচয় ছিল না, তা বলতে পারি নে। তার প্রমাণ, পরে আমি একটি খাতায় তাঁর কবিতার মধ্যে আমার প্রিয় কবিতাগুলির একটি সঞ্চয়িতা লিখে রেখেছি। আমার মনে হয়, কড়ি ও কোমল থেকেই তাঁর কবিপ্রতিভার মর্ম সত্যিই বুঝতে আরম্ভ করেছি। ক্রমে মানসী, সোনার তরী, চিত্রা প্রভৃতি উনবিংশ শতাব্দীতে প্রকাশিত বইগুলির সঙ্গেই যেন বেশি ঘনিষ্ঠতা অনুভব করেছি। বিংশ শতাব্দী থেকেই যেন জীবনে একটা বড় ছেদ পড়ে যায়। আমারও বিয়ে হয়ে যায় আর রবিকাকাও শান্তিনিকেতনে বিদ্যালয় স্থাপন করায় একটু দূরে সরে যান।

সংগীত ও নাট্য-স্মৃতির মত এ ক্ষেত্রেও আশেপাশের লোকের স্মৃতি অচ্ছেদ্য-ভাবে জড়িত আছে। কারণ যদিও আমাদের শাস্ত্রমতে মানুষ একাই সংসারে আসে একাই যায়, কিন্তু ইতিমধ্যে যতদিন সে সংসারে বাস করে ততদিন আর-পাঁচজনকে নিয়েই তার জীবনের জাল গ্রথিত হয়। অক্ষয় চৌধুরী-দম্পতির স্মৃতি অগ্ন্যবসারী চৌধুরানীর গ্রন্থাবলীর আলোচনায় কিছু কিছু লিখেছি। সেই অতি অল্পবয়সেও অক্ষয়বাবু আমার মত ছেলেমানুষকে যত্ন করে গোল্ডেন ট্রেজারি থেকে কবিতা পড়ে আমায় বুঝিয়ে দিতেন। বিশেষত The Bridge of Sighs কবিতাটির প্রথম লাইন One more unfortunate তখন বুঝতে পারি নি এবং এখন ভাবতে গেলে মনে হয় সে বয়সে সে-কবিতার সবটাই আমি বুঝতে অক্ষম ছিলাম। টমাস হুড-এর Song of the Shirt-ও মনে পড়ে। এমনকি গোল্ডেন ট্রেজারির সেই বিশেষ সংস্করণের প্রতিও মায়া পড়ে গেছে। মানুষের ছেলেবেলার স্মৃতির আর্শ্চর্য প্রভাব, সকলেই নিশ্চয়ই তা স্বীকার করবেন। অক্ষয়বাবু, সুরেন ও আমাদের বি. এ. পরীক্ষার পাঠ্যতালিকাজুক্ত ওথেলো পড়াতে পড়াতে নিজেই ক্লিন্নকর্ম কঁদে ভাসিয়ে দিতেন সে কথাও অগ্ন্যবসারি বলেছি। এই দুই অসমবয়স্ক বাল্যবন্ধুর প্রতি আমার শেষ শ্রদ্ধা ও প্রীতি নিবেদন করে গেলুম।

এখানে বাবা-মা'র প্রভাবের কথা উল্লেখ করা একেবারে অপ্ৰাসঙ্গিক নয় এই কারণে যে, তাঁরাও শুধু সাধারণভাবে ইস্কুলের পড়ার প্রতি মনোযোগ আকর্ষণ করে বাবা-মায়ের কর্তব্যপালন শেষ করেন নি, পীরস্তু জন্মাবধি সাহিত্যে আমাদের উৎসাহ ও রুচির গোড়াপত্তন করে দিয়েছেন। এখনও

মনে পড়ে, বানিয়নের *Pilgrims Progress*, *Arabian Nights*, *Grimms* আর *Hans Anderson* -এর রূপকথা, *Cervantes*এর *Don Quixote*এর কি সুন্দর রাজ-সংস্করণ বাবা আমাদের পড়তে দিয়েছিলেন। বিলেত থেকে ফিরে আসার পর মা আমাদের নিয়ে বছরখানেক সিমলে পাহাড়ে ছিলেন। তখন আমার বোধ হয় সাত বছর বয়স। কিন্তু স্পষ্ট মনে আছে— মনে করে নিজেই আশ্চর্য হই, সেই বয়সেই মা আমাদের শেলির *Sensitive Plant* আর *The Cloud*, টেনিসনের *May Queen* আর *The Brook* পড়াতেন, কারণ এই কবিতাগুলি তিনি ভালোবাসতেন। তার মর্ম কি বুঝতাম ভগবানই জানেন। কিন্তু নিশ্চয়ই অজ্ঞাতসারে সে সুন্দর ছন্দোবন্ধের মাধুর্য শিশুমনে প্রবেশ করেছিল, আনন্দ দিয়েছিল। শিক্ষাসম্বন্ধে মায়ের নিজস্ব কতকগুলি মত ছিল, তাই তিনি বাংলায় অক্ষরপরিচয় না করিয়েই কোলে বসিয়ে একেবারেই ভারতী পত্রিকা থেকে পড়িয়ে যেতেন। আর ঝাঁকাঝাঁকা অক্ষরে আমারই সমবয়সী উষাদিদি সুপ্রভাদিদি প্রভৃতি বোনদের চিঠি লেখাতেন। তার নীচে লেখা থাকত 'তুমি আমার চুমু নিও'। এখনও আমার নাতিনাতনীরা যখন 'Home They Brought Her Warrior Dead' টেটিয়ে আবৃত্তি করে, তখন স্মৃতির শততন্ত্রী একটি ক্ষুদ্র তারে অহরহণ ওঠে। আর নিজেকে এইজ্ঞে সৌভাগ্যবান বলে মনে করি যে, ছোটবেলায় কিছুকাল বিলেতে থাকার ফলে ইংরেজী ভাষার ব্যাকরণের বন্ধুর পথ তাদের মত কষ্ট করে অতিক্রম করতে হয় নি।

আর-একটি অপেক্ষাকৃত অল্পপরিচিত কবি অর্থাৎ টমাস মুরের লেখা 'লাল্লা রুখ' কাব্য মায়ের এবং সেই কারণে আমাদের খুব প্রিয় ছিল। তাঁর *Paradise and the Peri* প্রভৃতি কবিতা আমাদের সেকালে আনন্দ দিয়েছে, তার সাক্ষী এখানে দিয়ে গেলুম। এখনও ইচ্ছা আছে *Lallah Rookh* -এর সুন্দর গল্পটি মুক অভিনয় করাতে। কিন্তু পূর্বোক্ত সেই 'হায় রে দুর্ভাগ্য'র পুনরাবৃত্তি ছাড়া আর-কিছু করার নেই। রবিকাকাদের আমলে তাঁদের উপরে টমাস মুরের গান ও কবিতার প্রভাবের কথা অগত্যা বলেছি।

মুরের এই দুটি লাইন—

The young May moon is beaming, Love !

The glowworm's lamp is gleaming, Love !

তঁারা এইভাবে অনুবাদ করেছিলেন—

জ্যোৎস্না ফুটফুট, প্রিয়ে !

জোনাকি মিটমিট, প্রিয়ে ।

এডুইন আর্নল্ডের *Light of Asia* ও আমাদের খুব প্রিয় ছিল। এঁরা সেই দলের ইংরেজের মধ্যে, যারা কেবলমাত্র বিজ্ঞেতার রূপে গর্বে উদ্ধত না হয়ে ভারতবর্ষের ঐতিহ্য ও সভ্যতার প্রতি ঔৎসুক্য দেখিয়েছেন। আমাদের ছেলেবেলায় Col. Meadows Taylor নামে একজন লেখকের রচিত *Tara* এবং *Sita* উপন্যাস দুটি খুব পড়তুম। স্লিমান সাহেব নামে আর-একজন মৈনিক ঠগীর দল সম্বন্ধে কিছু বই লিখেছিলেন। সেগুলো এক সময়ে আমাদের পাঠ্য ছিল। জানি নে এখনকার ছেলেরা সেই গলায় ফাঁস দিয়ে মাতুষ-মারা দলের নামের সঙ্গে পরিচিত কি না। কেন জানি নে, সেনাবিভাগের একাধিক ইংরেজ কর্তা আমাদের দেশের সংগীত সাহিত্য সম্বন্ধে আলোচনা করে গেছেন। বোধ হয় শান্তির সময়ে তাঁদের জীবনের নিত্যকর্মের অভাববশত নিজ নিজ প্রবণতা অনুসারে যে দেশে বাস করছেন তার সংস্কৃতির বিভিন্ন শাখার চর্চা করার সুযোগ তাঁরা গ্রহণ করেছিলেন।

যদিও সিমলা পাহাড়ের উল্লিখিত পর্বের সঙ্গে রবিকাকার বিশেষ যোগ ছিল না তবু বাপ-মায়ের অপরিমিত স্নেহযত্ন-স্মরণার্থে এইটুকু লিখলুম।

সিমলা থেকে নেমে এলে সেই যে বছর-আঠেক বয়সের পর কলকাতার স্কুলে ভর্তি হলুম তখন থেকে প্রায় তাঁর জীবনান্ত পর্যন্ত রবিকাকার প্রত্যক্ষ ও পরোক্ষ প্রভাব আমাদের সাহিত্যজীবনকে গড়ে তুলেছিল, একথা অবশ্যস্বীকার্য। সে ক্ষেত্রে আজ পর্যন্ত আমরা যা-কিছু করেছি, হয়েছে, এমনকি ভেবেছি পর্যন্ত— তা তাঁর ব্যক্তিত্বের প্রভাবে আচ্ছন্ন। ছেলেবেলায় বিলেত যাওয়া আর ইংরেজী স্কুলে পড়ার দরুন, সত্যিকথা বলতে গেলে, আমার বাংলা ভাষা ও সাহিত্যের জ্ঞান অতি কাঁচাই থেকে যেত যদি না তাঁর সাহিত্যপ্রতিভার সংস্পর্শ পেতুম।

সবুজ পত্রের যুগ আমার বিয়ের পরবর্তীকালের হলেও রবিকাকার স্মৃতির সঙ্গে জড়িত। সবুজ পত্রের উৎপত্তি সম্বন্ধে সম্পাদক তাঁর ‘আত্মকথা’য় বলেছেন—

‘আমি আর মণিলাল রবীন্দ্রনাথের সঙ্গে শিলাইদহে পদ্মানদীর উপর তাঁর

বোটে একবার কিছুদিন থাকতে যাই। এই বোটেই মণিলালের কাছে গুনি যে রবীন্দ্রনাথ বলেন আর লিখবেন না। তিনি ঢের লিখেছেন। তিনি বলেন যে, প্রথম যদি একটা কাগজ বের করে তা হলে আমি তাতে লিখতে রাজি আছি। আমি বললুম— আপনি যদি লেখেন তো আমিও কাগজ বার করতে রাজি আছি। তিনি বললেন— অল্প কোনো কাগজে আমি লিখব না।

‘মণিলালের একটি কাগজ ছিল। কথা ঠিক হয় যে, সেই কাগজই সবুজ পত্র নামে ছাপানো হবে। এই নতুন নাম আমিই দিয়েছিলুম। রবীন্দ্রনাথের জন্মদিনে ১৩২১ সালের বৈশাখে সবুজ পত্র প্রথম বেরয়।’

সবুজ সভার সভ্যগণ হুগুয় একদিন করে আমাদের কাছে বিকেলে আসতেন। কিঞ্চিৎ জলযোগের পর কখনো সাহিত্যালোচনা কখনো সংগীতচর্চা হত। গুনতে পাই যে, শ্রীসত্যেন্দ্রনাথ বসু এসরাজ বাজাতেন, কিন্তু আমি তাঁর এসরাজ কখনও গুনি নি। মণ্টু যখন আসত, সে গান করত। বাড়ির মেয়েরাও কখনো কখনো করত। আমরা বাড়ির মেয়েরা, বল! বাজল্য, সাধারণত রবিকাকার গানই করতুম। রমার মুখে ‘এই যে কালো মাটির বাসা’ আর ‘আমার একটি কথা বাঁশি জানে’, অপূর মুখে ‘যদি প্রেম দিলে না প্রাণে’ আর ‘দাঁড়িয়ে আছ তুমি আমার গানের ওপারে’ গানগুলি গুনতে লোকের খুবই ভালো লাগত। নাটোরের মহারাজ জগদীন্দ্রনাথ এই রকম এক আসরে ‘শ্রাবণের ধারার মতো পড়ুক ঝরে’ গানটি শুনে বলেছিলেন, ‘রবিবাবু গীতাঞ্জলির জন্তু একবার নোবেল প্রাইজ পেয়েছেন, এই গানটির জন্তু তাঁকে আর-একবার প্রাইজ দেওয়া উচিত।’ রবিকাকা যখন কলকাতায় আসতেন তখন মাঝে মাঝে এই আসরে উপস্থিত থাকতেন। সবুজ পত্র-সম্পাদক আরও বলেছেন—

‘রবীন্দ্রনাথ বোটে আমাদের যে কথা দিয়েছিলেন সে কথা তিনি অক্ষরে অক্ষরে পালন করেছিলেন। তাঁর লেখা অঙ্গীকার না করে সবুজ পত্রের কোনো সংখ্যাই বেরয় নি। এবং তাঁর এই সাহচর্য না পেলে যে আমি ছয় মাসও সবুজ পত্র চালাতে পারতুম না, সে কথা বলাই বাহুল্য। মণিলাল রবীন্দ্রনাথকে বলেন যে, “আপনার সবুজ পত্রের লেখার সঙ্গে অল্প লেখার এত তফাত যে অল্প কোনো কাগজে আপনার লেখা দিলে তার তেমন সমাদর হবে না।” রবীন্দ্রনাথ এ কথা সমর্থন করেন।’ •

আমার কেবল মনে হয় যে রবিকাকার মত লেখকের দুর্লভ সাহায্য পেয়ে

তবু যে উনি আরও কিছু দিন কাগজটা চালাতে পারলেন না, সে অনেকটা বৈষয়িক সুপরিচালনার অভাবে। যে কারণেই হোক, অত শীঘ্র বন্ধ হয়ে যাওয়া বড়ই পরিতাপের বিষয়। তবে এই মাত্র সান্ত্বনা যে যতদিন চলেছিল স্ত্রী নাম রেখে গেছে, যার সৌরভ ও গৌরব একাল পর্যন্ত চলে এসেছে। আমার দিক থেকে বলবার আছে যে, আমার যেটুকু রচনাশৈলীর শিক্ষা হয়েছে সে ঐ সবুজ পত্রেরই দৌলতে। ১৯০২ সালের রানী ভিক্টোরিয়ার মৃত্যুঘটিত কাঠখোঁট রচনার পর এই দশ-বারো বছরে সঙ্গুণে বা যে কারণেই হোক, আমার লেখার যে উন্নতি হয়েছিল তার ফলে আমার সবুজ পত্রে লেখা প্রবন্ধ-সংগ্রহ সবে-ধন-নীলমণি 'নারীর উক্তি' বইখানি তখনকার কালে অনেকের ভালো লেগেছিল।

আমার সাহিত্যস্মৃতি সম্পূর্ণ করতে হলে রবিকাকার রচনার ইংরেজী অনুবাদের উল্লেখও করতে হয়। তাঁর গুটিকতক কবিতা ও গান আমি তর্জমা করেছি, যা পড়ে তিনি খুশি হয়েছিলেন। মনে আছে, সংক্ষেপ করার জন্য জনগণমনের দুটি শব্দক বাদ দেওয়ায় তিনি আপত্তি করেছিলেন। গণের মধ্যে জাপানযাত্রী আর কয়েকটি গল্প আমি অনুবাদ করেছি। সুরেনও এ বিষয়ে খ্যাতি অর্জন করেছেন।

কাব্যের সঙ্গে শিল্প স্বভাবতই জড়িত। কিন্তু রবিকাকা অনেক বয়সে শিল্প-লক্ষ্মীর আরাধনা শুরু করেছেন, কাজেই আমার সে বিষয়ে ছেলেবেলাকার বিশেষ কোনো স্মৃতি নেই। তবে তাঁর যে আঁকবার হাত আছে তার পরিচয় আমরা ছেলেবেলা থেকেই পেয়েছি। জ্যোতিকাকামশায়ের মত পেনসিলে প্রতিকৃতি আঁকায় পারদর্শী না হলেও আর অত খ্যাতি অর্জন না করলেও তিনি পেনসিলে কারো কারো ছবি আঁকেছেন বলে মনে পড়ে। ১৮৯২ সালে আমরা কিছু দীর্ঘ দিন ধরে সিমলে পাহাড়ে থাকি। সেই সময় কলকাতার ৫ নম্বর দ্বারকানাথ ঠাকুর গলির বাড়ির সঙ্গে সিমলের উডফিল্ড বাড়ির যে হেঁয়ালিচিত্র-বিনিময় চলত তার নমুনা এখনও রবীন্দ্রসদনে আছে। তাতে জোড়াসাঁকোর পক্ষে ছিলেন রবিকাকা গগনদাদা অবনদাদা প্রভৃতি মহারথীরা। আর পাহাড়ী-পক্ষে ছিলেন জ্যোতিকাকা আর সুরেনদাদা। সেই অল্পবয়স থেকেই তাঁদের অতি সাধারণ জিনিস আঁকবারও কী সুন্দর কায়দা ছিল। রবিকাকার

হাতেরও কতগুলি হেঁয়ালিচিত্র এতে আছে। হেঁয়ালিরচনাতেও তাঁর স্বাভাবিক মৌলিকতা যেমন ফুটে উঠেছে তেমনি এইসব পেনসিলে আঁকা ছবিতেও তাঁর ভবিষ্যৎ চিত্রকলাসাধনার সংকেত ধরা পড়ে।

আমি আগে বোধ হয় বলেছি যে, জোড়াসাঁকোর ৫ নম্বর আর ৬ নম্বরের দুই বাড়ি সরস্বতীর চিত্রকলা আর সংগীতকলার দুই দিক ভাগ করে নিয়ে-ছিলেন। ৬ নম্বর বাড়িতে যেমন প্রতি ছেলেমেয়ে হারমোনিয়ম বাজিয়ে একটা গান গাইতে পারতেন না তা নয়, তেমনি ৫ নম্বরেও প্রত্যেকেই ছোটবেলা থেকে রেখার আঁচড় আর রঙের পোঁচ দিতে পারতেন। তবে সেই সীমারেখা এমন দুর্লভ ছিল না যে এপাশ থেকে ওপাশে একেবারে যাওয়া চলত না। যেমন সত্যদাদাও কিছু কিছু ছবি আঁকতেন আর অবনদাদাও কিছু কিছু গানবাজনা করতেন। রবিকাকা সম্বন্ধেও এ কথা খাটে; তাঁর চিত্রকলার সাধনা অবশ্য কিছু দেরিতে প্রকাশ পেয়েছে।

ভ্রমশ্রুতি

জানি নে কোন্ সূত্রে, কিন্তু বৃহৎ পরিবারের ভিতর ভাইয়েদের মধ্যে রবিকাকা ও জ্যোতিকাকামশায়ের এবং বোনদের মধ্যে স্বর্ণপিসিমার সঙ্গে বাবার বেশি ঘনিষ্ঠতা ছিল। জ্যোতিকাকামশায় ছেলেবেলায় মাদের সঙ্গে বোম্বাই চলে যান এবং রবিকাকাও তো বাবার সঙ্গে বিলেত যান। সেইখান থেকেই আমাদের সঙ্গে বিশেষ ঘনিষ্ঠতার সূত্রপাত হয়। যখন-যা আবদার করতুম সবই তিনি পূরণ করতেন। একবার মনে আছে হাজারিবাগ কনভেন্টে আমাকে নিয়ে যাবার জন্তে তাঁকে ধরি।

দেশে শাসক-সম্প্রদায়ের মত কনভেন্টেও নান্দেবও মাঝে মাঝে বদলি করা হত, কেন জানি নে। পাছে কোনো এক জায়গায় মায়াবদ্ধ হয়ে পড়েন, সেই ভয়ে সম্ভবত। সেইভাবে Sister Aloysiaকে হাজারিবাগ কনভেন্টে বদলি করা হয়েছিল। সে বাড়িটা শুনেছি কবি কামিনী রায়ের স্বামী কেশব রায়ের বাড়ি ছিল। রবিকা বলবামাত্র আমাদের নিয়ে যেতে রাজি হলেন। হাজারিবাগ রোড স্টেশনে নেমে পুশপুশ গাড়ি করে বাকি পথটা যেতে হত। পুশপুশ একরকম বড়গোছ মাছুষ-ঠেলা পালকি-গাড়ি বলা যেতে পারে, তাতে শোওয়াও চলে। রাত্রিবেলা ঘনজঙ্গলের মধ্যে দিয়ে যাওয়া খুব নিরাপদ ছিল না, কারণ বাঘভাল্লুকের সঙ্গে দেখা হলেও হতে পারে। যদিও আমাদের সে রকম কোনো বিপদ ভাগ্যে ঘটে নি। হাজারিবাগ পৌছে বোধ হয় ডাকবাংলোতেই আশ্রয় নিয়েছিলুম। এখনও পুরনো বালক মাসিকপত্রের পাতা উলটালে সেই ডাকবাংলোর হাতায় ইঞ্জি-চেয়ারের উপর পা তুলে দেওয়া রবিকা'র একটা ছবি দেখতে পাওয়া যাবে। অবশ্য আর্টিস্টের ঝাঁক চেহারাটি যে রবিকা'র সেটি ধরে নিতে হবে। আমার একটু একটু মনে পড়ে যেন আমরা কোনো যাহুগোপাল মুখুজ্জের বাড়ি উঠেছিলুম। আমি অবশ্য আমার প্রিয় শিক্ষয়িত্রীকে দেখতে কনভেন্টে যাত্রা করতুম— মনে হয় তাঁর জন্ত কিছু উপহারও নিয়ে গিয়েছিলুম। আমার নিষ্ঠা দেখে নিশ্চয়ই তিনি খুশি হয়েছিলেন; ছ দিন মাত্র বোধ হয়

সেখানে ছিলুম, তার পরে যে পথে এসেছিলুম সেই পথেই ফিরে গেলুম। এই সপ্তাহব্যাপী কষ্টকর ভ্রমণে যে রবিকা' রাজি হয়েছিলেন, তাতেই বোঝা যায় তিনি আমাদের কত স্নেহ করতেন। আবার মনে হয়, হয়তো ঐ বয়সে কোনো কষ্টকেই কষ্ট বলে মনে হয় না, সবটাতেই আনন্দ বোধ হয়।

আর-একবার মনে আছে রবিকা'র সঙ্গে মুসৌরি পাহাড়ে যাই। তার পরে সোলাপুরেও রবিকা আমাদের সঙ্গে ছিলেন। কারোয়ারেও ছিলেন, সেখান থেকেই তো বিয়ে করতে কলকাতায় চলে যান। জ্যোতিকা-কামশায়ের 'সরোজিনী' জাহাজেও আমরা একত্র ছিলাম। মনে আছে একবার খুব ঝড় হবার উপক্রম হওয়াতে মা রবিকাকার সঙ্গে আমাদের বাড়ি পাঠিয়ে দেন। জ্যোতিকা-কামশায়ের আঁকবার খাতা তো তাঁর সঙ্গী ছিল। সেই জাহাজে বসেই আমাদের অনেক ছবি এঁকেছিলেন। এখনও তাঁর খাতা কোথাও সঞ্চিত থাকতে পারে। রবিকা'র নানারকম মজার মজার মুখের ভাব দিয়ে ছবি এঁকেছিলেন। আর-একটি নতুন জিনিস করেছিলেন, আলাদা করে কেবল চোখ আঁকা। তার পরে কোনো-এক বইয়ে দেখছি, একরকম খেলা আছে, তাতে একটা খবরের কাগজের পর্দার আড়ালে একদল বসে এবং প্রত্যেকের চোখের মাঝে একটা গবাক্স কাটা থাকে, তাতে চোখ দিয়ে বসতে হয়। পর্দার ওপার থেকে একজন চোখ দেখে কার চোখ চিনতে চেষ্টা করে। খেলাটা আমরা কখনও খেলি নি, একবার খেলে দেখবার চেষ্টা করলে হয়। সেই জাহাজে নদীর হাওয়াতে স্নেহের ও আমার খুব ক্ষিদে পেত এবং ক্রমাগত কুচো গজা ভেজে দেবার জন্তে রান্নাঘরে তাগিদ দিতুম মনে আছে। সেই জাহাজের ব্যবসায়ে তো জ্যোতিকা-কামশায়ের সর্বনাশ হয়ে গেল। কিন্তু সে কথা বোঝবার বয়স আমাদের তখন হয় নি। এই জাহাজেই আমরা ছিপুদাদার বিয়েতে বরিশাল গিয়েছিলুম। পরে সিমলে পাহাড়ে রবিকাকা দিন-কতক আমাদের সঙ্গে ছিলেন।

রবিকাকার প্রথম মেয়ে বেলা হবার পর রবিকা গাজিপুরে আমাদের নিয়ে গিয়েছিলেন। গাজিপুর তার সুন্দর গোলাপফুল এবং গোলাপজলের জন্তু বিখ্যাত বটে, কিন্তু তার চেয়েও বেশি বিখ্যাত হওয়া উচিত তার গরমের জন্তু। আর সে শুকনো গরম, যে, নাবার সময় গায়ে জল ঢেলে আর তোয়ালে দিয়ে মোছার আবশ্যক হত না; এমনিই গায়ের জল গায়ে শুকিয়ে যেত।

রাত্রিবেলা লোকে বিছানা-বালিশ-ঘাড়ে খুঁজে বেড়াত বাগানে বাইরে কোথায় গুলে একটু ঠাণ্ডা হাওয়া পাওয়া যায়। ভজিয়া নামে বেলার এক খাঁদা দাসী ছিল। সে অনেক দিন পরে আমার কাছেও কাজ করেছিল। সে আমাকে দিদিয়া বলেই ডাকত। ওদের দেশের এই 'ইয়া' অন্ত, যথা পানিয়া ইত্যাদি, কথাগুলি শুনতে বড় মিষ্টি লাগে এবং অনেক হিন্দী গানেই দেখা যায়। গাজিপুরে জ্যোতিকা কামশায়ের শস্তুর শ্রামলাল গাঙ্গুলিও ছিলেন। মনে আছে তিনি বেগুন মূলো ও বড়ি দিয়ে গুড়-অম্বল রেঁধে রান্নাঘরের তাকে তুলে রেখে কাশী বেড়াতে যেতেন এবং ফিরে এসে খেতেন। ততদিনে বেশ সুন্দরভাবে মজ্জা থাকত। সত্যি কথা বলতে কি, সে রকম সুস্বাদু গুড়-অম্বল তার পরে আর খাই নি, যদিও বেগুন মূলো বড়ি দিয়ে পরে অনেককে রাঁধতে দেখেছি। এঁরই ছোট ভাই অমৃতলাল গাঙ্গুলি জ্যোতিকা কামশায়ের বিশেষ বন্ধু ছিলেন। তাঁর বিষয়ে দুটি অতি সামান্য স্মৃতি উল্লেখযোগ্য না হলেও বলছি। একটি হচ্ছে যে, তিনি বসতবাড়ির সামনে বেষ্টিতে বসে মুসলমান দেখলেই বলতেন, 'ওহে, আমাদের পরব কবে?' যেন তিনি তাদেরই একজন। আর-একটা হচ্ছে যে, তিনি পোস্টাপিসে চাকরি করতেন, তাই বৎসরান্তে হিসেব মেলাবার সময় বেশ একটি বড় অঙ্কের হিসেবের গরমিল হলেও miscellaneous unforeseen expenses বলে তা মিলিয়ে দিতেন। এই একই স্থলে আমাদের আর-একজন বিশিষ্ট বন্ধু নাকি লিখতেন G. O. K. (God only knows) এবং আমার ক্ষুদ্র অভিজ্ঞতার কথা বলে শেষ করি— মা লিখতেন বি ব্যয় (বিশ্বত ব্যয়)।

আমাদের সঙ্গে এক বাড়িতে রবিকাকার থাকার প্রসঙ্গে মনে পড়ে যে, তিনি একবার দাজিলিঙ আর তিনধরিয়ায় আমাদের সঙ্গে অনেকদিন কাটিয়ে-ছিলেন। সময়টা ঠিক মনে করতে পারছি নে।

তিনধরিয়াতে আমার বড়ভাতুর একটি চা-বাগানের বাড়ি কিনে তাকে সুন্দর করে বাড়িয়ে সাজিয়ে তুলেছিলেন। সেখানে একবার দিছু আর তার স্ত্রী কমলা-বউমার সঙ্গে আমরা দিনকতক বেড়াতে গিয়েছিলুম। রবিকা দাজিলিঙ যাবেন শুনে তাঁকে আমাদের ওখানে কিছুদিন থেকে যাবার নেমস্তন্ন জানিয়েছিলুম। তিনি নিমন্ত্রণ রক্ষা করলেন বটে, কিন্তু খুব যে মনের স্বখে ছিলেন, তা বলতে পারি নে। বাগানে বেশ ছোট্ট একটি আলাদা ঘর ছিল, সেখানে সকালে তাঁকে নিয়ে বসতুম আর রিপূর্কর্ম করতে করতে গল্প করতুম,

যেমন আমার বাতিক আছে। তিনি বলতেন, পাহাড়ে জায়গা তাঁর তেমন ভালো লাগে না। কারণ চার দিকে পাহাড় ঘিরে থাকে, দৃষ্টিকে বাধা দেয়। তিনি পছন্দ করেন উন্মুক্ত প্রান্তর— যেমন শান্তিনিকেতনে দেখা যায়, যেখানে দৃষ্টি দিগন্তের শেষ পর্যন্ত প্রত্যেক ঋতুকে যেন এগিয়ে গিয়ে অভ্যর্থনা করতে পারে। আমি নিজে এ কথার সার্থকতা বুঝতে পারলুম যখন উদয়নের দোতলার জানলার ধারে বসে কাচের সার্শির ভিতর দিয়ে দেখতে পেলুম যেন বর্ষার ধারা সার-বাধা সেনাবাহিনীর মত মাঠের উপর দিয়ে দৌড়ে আসছে। রবিকা কেবল দু-তিন দিনের জন্ত তিনধরিয়ায় থেকে দার্জিলিঙে চলে গেলেন। বোধ হয় সেবারেই আমরা আবার তাঁর সঙ্গে দার্জিলিঙে একটা দোতলা বাড়িতে ছিলুম।

পারিবারিক স্মৃতি

পারিবারিক স্মৃতির কথা বলতে গেলে প্রথমেই পরিবারপত্তন বা বিয়ের কথা তুলতে হয়। যশোর জেলা সেকালে ছিল ঠাকুরবংশের ভবিষ্যৎ গৃহিণীদের প্রধান আকর। কারণ সে দেশে ছিল পিরালী সম্প্রদায়ের কেন্দ্রস্থল। শুনেছি সেখানকার মেয়েদের রূপেরও স্বখ্যাতি ছিল, যদিও পুরনো দাসী পাঠিয়ে তাদের পছন্দে নির্বাচন করে আনা হত। পূর্বপ্রথাহুসারে রবিকাকার কনে খুঁজতেও তাঁর বউঠাকুরানীরা, তার মানে মা আর নতুনকাকিমা, জ্যোতিকা কামশায় আর রবিকাকাকে সঙ্গে বেঁধে নিয়ে যশোর যাত্রা করলেন। বলা বাহুল্য আমরা দুই ভাইবোনেও সে-যাত্রায় বাদ পড়ি নি। যশোরে নরেন্দ্রপুর গ্রামে ছিল আমার মামার বাড়ি। সেখানেই আমরা সদলবলে আশ্রয় নিলাম। সেই বোধ হয় আমার জীবনে প্রথম গ্রাম দেখা। পরেও এ বিষয়ে খুব বেশি অভিজ্ঞতা হয় নি। একটি বড় আঙিনার চারি দিকে চারটি আলাদা ঘর নিয়ে বাড়িটি তৈরি। এইখানে একদিন স্থরেন ও আমি বাগানে খেলা করছি এমনসময় জ্যোতিকা কামশায় গুঁরা আমাদের ডেকে জিজ্ঞাসা করলেন কটা বেজেছে। তার উত্তরে আমি স্বীকার করলুম যে, ঘড়ি দেখতে জানি নে। তখন তাঁরা আমাদের ঘরের ভিতর ডেকে নিয়ে গিয়ে ঘড়ি দেখতে শেখালেন, সে শিক্ষা আর ভুলি নি। যদিও এই বউ-পরিচয়ের দলে আমরা থাকতুম না, তা হলেও শুনেছি যে তাঁরা দক্ষিণডিহি চেলুটিয়া প্রভৃতি আশেপাশের গ্রামে যেখানেই একটু বিবাহযোগ্য মেয়ের খোঁজ পেতেন সেখানেই সন্ধান করতে যেতেন। কিন্তু বোধ হয় তখন যশোরে সুন্দরী মেয়ের আকাল পড়েছিল, কারণ এত খোঁজ করেও বউঠাকুরানীরা মনের মত কনে খুঁজে পেলেন না। আবার নিতান্ত বালিকা হলেও তো চলবে না। তাই অবশেষে তাঁরা জোড়াসাঁকোর কাছারির একজন কর্মচারী বেণী রায় মশায়ের অপেক্ষাকৃত বয়স্কা কন্যাকেই মনোনীত করলেন। তাঁর বাপের বাড়ির নাম ছিল ভবতারিণী। শ্বশুরবাড়ি এসে তাঁর নাম বদলে ঝগালিনী রাখা হল, বোধ হয় বদ্বের নামের সঙ্গে মিলিয়ে। রূপে না হলেও গুণে তিনি পরবর্তী জীবনে শ্বশুর-বাড়ির সকলকে আপন করতে

পেরেছিলেন, এ কথা সেকালের অনেকেই জানেন।

এই যশোরযাত্রার যে বীজ বপন করা হয় সেটির ফল ফলে ১৮৮৩ খ্রীষ্টাব্দে। রবিকার'র বয়স যখন বছর-বাইশেক হবে, তখন তিনি আমাদের সঙ্গে বোম্বাইয়ের কারোয়ার বন্দরে ছিলেন। সেখানে থাকতেই বিয়ের জন্তে বাড়ি থেকে তাঁর ডাক পড়ে। আমরা তাতে উপস্থিত ছিলাম না। কিন্তু পরে শুনেছি যে, শুভকার্ষে একটি পারিবারিক শোকের ছায়া পড়েছিল; আমার বড়পিসেমশায় সারদাপ্রসাদ গঙ্গোপাধ্যায় ঠিক ঐ সময়ে জমিদারি পরিদর্শন করতে গিয়ে সেখানে মারা যান। এই দুঃখের সংবাদ জ্যোতিকা'কা তারযোগে বড়পিসিমাকে কারোয়ারে পাঠান। তখন তিনিও আমাদের সঙ্গে সেখানে ছিলেন। অবশ্য প্রকৃত ঘটনার স্পষ্ট উল্লেখ না করে কেবল সংকটাপন্ন অবস্থার কথা জানিয়েছিলেন। সেই শুনে বড়পিসিমাকে সঙ্গে নিয়ে মা আর আমরা কলকাতায় ফিরে এলাম। এখনও মনে পড়ে জোড়াসাঁকোর দেউড়িতে নেমে বড়পিসিমা জ্যোতিকাকামশায় প্রভৃতির নীরব মুখের দিকে দু-একবার চেয়ে কিরকম করে সোজা তেতলার ঘরে উঠে গিয়ে একটি বিছানায় মুর্ছিত হয়ে পড়লেন। এই জন্তেই রবিকাকার বিবাহ-অন্ত্যষ্ঠানের সঙ্গে আমার কোনো ব্যক্তিগত স্মৃতি জড়িত নেই। তবে আগেই বলেছি, আমরা কলকাতার দক্ষিণাঞ্চলে যেসব ভাড়া-বাড়িতে থেকেছি সেখানে জোড়াসাঁকোর আত্মীয়-স্বজনদের সবসময়েই যাতায়াত ছিল। আমার মা'ও খুব আত্মীয়বৎসল আর সেবাপরায়ণা ছিলেন।

বেলা যেন মোমের পুতুলটির মত হয়েছিল। তাকে দেখতে প্রথম দিন যখন বাড়ির ভিতরে গেলুম তখন স্থির করলুম তার দৈনন্দিন জীবনী আমি রোজ লিখব। কিন্তু কয়দিনের বেশি সে সংকল্প স্থায়ী হয় নি। উইলিয়ম আর্চার একবার কলকাতায় এসে রঙিন পেনসিল দিয়ে আমাদের অনেকের ছবি এঁকে-ছিলেন, তার মধ্যে বেলাকে কোলে করে রবিকাকার ছবিটি আশা করি এখনও আছে। বেলা সন্ধ্যাে কিছু কিছু অল্প উল্লেখ করেছি। সে বড় বয়সেও দেখতে সুন্দরী ছিল। কিন্তু শিশুকালের সেই মোমের পুতুলের মত সেই গোল মুখলী ক্রমে বদলে গিয়ে মুখখানি যেন লম্বাটে গড়ন হয়ে গিয়েছিল। যাকে মেয়েলি ভাষায় বলে 'আম-দিগ্গি'। স্বাকিমার কথা আগেই বলেছি যে, তিনি স্নেহ-মমতাময় আম্মদে মিশুক প্রকৃতির গুণে পরিবারের সকলকে সহজেই আপন

করতে পেরেছিলেন। আমার মনে হয় যশোরের মেয়েরাই সাধারণভাবে এই গুণগুলির অধিকারিণী ছিলেন। বিশেষত, রাঁধাবাড়ী সম্বন্ধে কাকিমার খুব শখ ছিল। তাঁর কনিষ্ঠা কন্যা মীরাতেও তা সংক্রামিত হয়েছে। শুনেছি, শাস্তি-নিকেতনে থাকার সময় আশ্রমের ছেলেদের জন্ত আশুন-তাতে রোঁধে রোঁধেই কাকিমার শেষ অসুখের সূত্রপাত হয়। আরও শুনেছি রবিকা'র জমিদারি পরিদর্শনের জন্ত শিলাইদহের কুঠিতে থাকা কালে নাটোরের মহারাজা প্রতৃতি যখন তাঁদের অতিথি হতেন তখন আর কোনো রকম মিষ্টান্ন না পেয়ে কাকিমা এমন সুন্দর গাজরের হালুয়া তৈরি করতেন যে তাতেই তাঁরা পরিতুষ্ট হয়ে যেতেন। কাকিমার 'রাজা ও রানী' অভিনয়ে যোগ দেবার কথাও আগে বলেছি। রবিকা'র চিঠিপত্র প্রথম খণ্ডে যে পারিবারিক জীবনের সুন্দর ছবি পাওয়া যায়, তার উপর আমার বেশি কিছু বলবার নেই।

রবিকাকার ছেলেমেয়েদের মধ্যে, বেলা তাঁর রঙ কতক পরিমাণে পেয়েছিল—আমার বাবার মতো তদতিরিক্ত। তাঁর নিজের মুখে শুনেছি যে, বিলেতে রথীর খুব handsome বলে নাম ছিল। সেই সঙ্গে শরীরের গঠন আর স্বাস্থ্য ভালো ছিল। লোকে বলে যে, রবিকাকার ছোটছেলে শমীন্দ্রই বেশি তাঁর মত দেখতে ছিল। শমী অল্পবয়সেই বিসর্জনের মত শক্ত নাটকের কথিতাও অনর্গল মুখস্থ বলতে পারত। দুলে দুলে রবিকাকার উপাসনা করাও নকল করত। হেমলতা বউঠানের কাছে শুনেছি, বাপের টেবিলে বসে নাকি তাঁর মত লেখক হবার অভিনয় করত। বারো বছর আন্দাজ বয়সে তাকে ছুটির সময়ে রবিকাকা মুন্সেরে পাঠিয়েছিলেন, সেখানে কলেরা রোগে আক্রান্ত হয়ে অকালে আমাদের ছেড়ে চলে যায়। অসুস্থতার খবর পেয়ে তিনি সেখানে যান। আমি সে সময়ে যদিও উপস্থিত ছিলাম না, কিন্তু অত্যন্ত প্রত্যক্ষদর্শীর কাছে শুনেছি, এখানকার সকলে আশা করেছিল যে, তিনি শমীকে নিয়ে ফিরবেন। সে জায়গায় যখন তিনি একা ফিরলেন—সেই মর্মান্তিক দৃশ্য আর তাঁর গভীর শোকের নিঃশব্দ প্রকাশ তাঁদের পক্ষে সহ্য করা শক্ত হয়েছিল। তাঁদের মতে এই শেষ শোকটিই তাঁকে বেশি গুরুতরভাবে বেজেছিল। শমীর রোপিত একটি লতায় তিনি নাকি নিজের হাতে জল দিতেন। সেই কারণে সেদিন পর্যন্ত হেমলতা বউঠান উপাচার্যকে বিশেষ অনুরোধ করে গেছেন যেন সেই লতাটিকে যত্নপূর্বক রক্ষা করা হয়। তার নামে বিদ্যালয়ের একটি বাড়ির

নাম দেওয়া হয়েছে শমীজুটীর, তাও অনেকে জানেন।

রবিকাকার পারিবারিক স্মৃতি লিখতে বসে প্রথমেই এ কথা মনে না হয়ে যায় না যে, অতুল প্রতিভা ও বিশ্বব্যাপী খ্যাতি যিনি পেয়েছিলেন পারিবারিক জীবনে তিনি অনেক দুঃখও পেয়েছিলেন। পাঁচ সন্তানের মধ্যে বড় দুই মেয়ে ও কনিষ্ঠ পুত্রের অকালমৃত্যু তাঁকে সহ্য করতে হয়েছে। সেসব মর্মভেদী শোক যদিও তিনি বাইরে শাস্তভাবে সহ্য করেছেন কিন্তু তাঁর স্নেহপ্রবণ মনে কতটা যে আঘাত লেগেছিল তা কিছুটা অনুমান করতে পারা যায়।

মহর্ষি ব্রাহ্মধর্মকে হিন্দুধর্মেরই একটি শাখা বলে প্রচার করতে উৎসুক ছিলেন। সেইজন্তু মূর্তিপূজা বাদ দিয়ে হিন্দুসমাজের রীতি রক্ষা করে তাঁর সব অনুষ্ঠান-পদ্ধতি রচনা করেন। কিন্তু রবিকাকা সেরকম কোনো পূর্বসংস্কারে আবদ্ধ ছিলেন না। তাঁর পারিবারিক জীবনেই তার প্রমাণ দিয়েছেন। বড়-ছেলের বিধবাবিয়ে দিয়েছেন, বড়মেয়ের যে-শ্রেণীর ব্রাহ্মণের সঙ্গে বিয়ে দেন সেটি তাঁর কুটুম্বজনের মনঃপূত হয় নি। এই দুটি তৎকালীন সমাজবিরুদ্ধ কাজের জন্তে তাঁকে কিছু কিছু লাঞ্ছনা ভোগ করতে হয়েছে। প্রথমোক্ত ক্ষেত্রে গুনেছি অতিনিকট কুটুম্ববাড়িতে বিয়ের উপলক্ষে রবিকাকা আর তাঁর পরিবারবর্গকে নিমন্ত্রণ করা হয় নি। সেজন্তে জ্যাঠামশায় তাঁর পরিবারের সবার সেই বিবাহানুষ্ঠানে যোগ দেওয়া বন্ধ করেছিলেন। দ্বিতীয় ক্ষেত্রে সেই একই কুটুম্ববাড়ির লোক রবিকাকার মেয়ের বিয়েতে যোগ দেন নি। কিন্তু নিকট-আত্মীয়ের এসব বিরুদ্ধাচরণ অপ্রিয় হলেও রবিকাকাকে তাঁর অভিপ্রেত কাজ থেকে বিরত করতে পারে নি। গুনেছি, তিনি নাকি নিজেকে ব্রাহ্মসমাজের কোনো সম্প্রদায়েরই দলভুক্ত মনে করতেন না। কাজেও তাই প্রতিপন্ন করেছেন। তিনি নিজে বসে থেকে আদি ব্রাহ্মসমাজের অনুষ্ঠানপদ্ধতি অনুসারে বিজাতে নিকট-আত্মীয়ের বিয়ে দিয়েছেন দেখেছি। অনাত্মীয়দের মধ্যেও এইরকম ভিন্নজাতে রেজিস্ট্রিবিহীন বিয়েতে তিনি আচার্যের কাজ করেছেন। এসব গুরুতর বিষয়ের আলোচনা আপাতত বাদ দিয়ে একটি সামান্য পারিবারিক ঘটনার উল্লেখ করছি।—বেলাকে যখন তার ভবিষ্যৎ শ্বশুরবাড়ির লোকেরা দেখতে আসে তখন রবিকাকার লালবাড়ির (এখনকার গ্রন্থনবিভাগ) বারান্দায় তাঁদের খাওয়ানো হয়। আমরা মেয়ের দল পাশের ছোট ঘর থেকে খড়খড়ে তুলে তাঁদের উঁকি মেরে দেখেছিলুম।

এতদিন পরে স্বীকার করতে দোষ নেই যে, শরৎ চক্রবর্তী অর্থাৎ রবিকাকার মনোনীত জামাইয়ের চেয়েও তাঁর মেজভাই ঋষিবরই দেখতে ভালো ছিল। তাই আমরা মনে করেছিলুম যে, তিনিই আমাদের জামাইবাবু হবেন। পরে অবশ্য ঘটনা অন্তরকম হল। কিন্তু সেজন্তে আমাদের আপসোস করবার কিছু নেই, কারণ শরৎ তাঁদের স্বল্পকালস্থায়ী বিবাহিত জীবনে বেলার প্রতি বিশেষ অনুরক্ত ছিলেন। এমনকি আমার মনে আছে যে, বেলার মৃত্যুর পর তাঁদের ডিহিত্রীরামপুরের বাড়িতে গিয়ে দেখেছি, বেলার একটি বড় ছবির তলায় তিনি মাটিতে শুয়ে বই পড়ছেন। অনেকদিন পরে শুনে দুঃখিত হয়েছিলুম যে, শরৎ পক্ষাঘাতে পঙ্গু অবস্থায় তাঁর মেজভাইয়ের কাছে মারা যান।

সেজন্মেই রানীর বিয়ে হয় ডাক্তার সত্যেন্দ্রনাথ ভট্টাচার্যের সঙ্গে। তাঁর আর-এক ভাই শচীন্দ্রনাথ, সমরেন্দ্রনাথ ঠাকুরের জামাই। সত্যেন্দ্রকে রবিকাকা বিলেতে ডাক্তারি পড়তে পাঠিয়েছিলেন। একবার দ্বিপেন্দ্রনাথ প্রভৃতি এক দলের সঙ্গে সত্যেন্দ্র পশ্চিমে বেড়াতে যান। সেখানে সে সময়ে ভীষণ ম্যালেরিয়ার প্রকোপ। দেশে ফিরে অতেরা সে ধাক্কা সামলাতে পারলেও, দুঃখের বিষয়, সত্যেন্দ্র ম্যালিগ্নেন্ট ম্যালেরিয়ায় আক্রান্ত হয়ে মৃত্যুমুখে পতিত হন।

ক্রমশ যখন রানীর অসুখ ধরা পড়ল তখন শুনেছি নাটোরের মহারাজা তাঁকে মধুপুরে নিয়ে যান। অমলা দাসের পরিচর্যা আর হাওয়াবদলের গুণে তার বেশ উপকার হয়েছিল। কিন্তু সে উপকার স্থায়ী না হওয়াতে তাকে আরো উন্নতির আশায় রবিকাকা আলমোড়ায় নিয়ে যান। কিছুদিন সেখানে থেকে সেবাসুশ্রবা করেন। দুর্ভাগ্যবশত তাতেও রোগের কোনো উপশম নু হওয়াতে রবিকাকা তাকে কলকাতায় ফিরিয়ে আনতে বাধ্য হন। পাছে অগ্নি যানবাহনের ঝাঁকানিতে রানীর কষ্ট হয় সেজন্তে তিনি রানীকে ডুলিতে চড়িয়ে আলমোড়া থেকে নীচের রেলওয়ে স্টেশনে অতটা পথ সঙ্গে সঙ্গে হেঁটে চলে আসেন।

জ্যাঠামশায়ের সেজছেলে নীতীন্দ্রনাথ জনসাধারণে তেমন পরিচিত নন। আমাদের তিনি খুব ভালোবাসতেন। বিশেষ করে কাকিমার পরিবারের সঙ্গে তাঁর বিশেষ অন্তরঙ্গ সন্ধ ছিল। রানী তাঁর খুব স্নেহের পাত্রী ছিল। রানীর জন্মদিন ১১ই মাঘে তাকে কত সুন্দর উপহার দিতেন মনে আছে। মীরার একমাত্র ছেলের নাম যে নীতীন্দ্র রাখা হয়েছিল সে তাঁকেই স্মরণ করে।

নীতুদাদার শেষ অস্থখ প্রায় কাকিমার শেষ অস্থখেরই সমসাময়িক ছিল আর রবিকাকার লাল বাড়িতে থেকে তিনি তাঁদেরই তত্ত্বাবধানে ছিলেন। তিনি একটু ভোজনবিলাসী ছিলেন। ডাক্তারের মতামতমুতায় সে লোভ যদি সম্বরণ করতে পারতেন, তা হলে হয়তো তাঁর অকালমৃত্যু হত না। শেষ মুহূর্তে তিনি ‘কে জানিত তুমি ডাকিবে আমারে ছিলাম নিদ্রামগন’ এই কীর্তনাদ্ধ গানটি গুনতে চেয়েছিলেন মনে করলে কষ্ট হয়।

ব্যক্তির পরিচয় তার বাইরের চেহারা থেকে প্রথম আরম্ভ হয়। রবিকাকার চেহারা তো ছবিতে ছবিতে পৃথিবীময় ছড়িয়ে পড়েছে। সেই পুরুষোচিত দীর্ঘাকৃতি এবং যীশুখৃষ্টতুল্য মুখাবয়বের প্রতিকৃতি কে না দেখেছে? বোধ হয়, এত ছবি কম মানুষেরই আঁকা বা তোলা হয়েছে। তাঁর সত্তর বছর বয়সের জয়ন্তীতে, মনে পড়ে, অমল হোম তাঁর যে আলোকচিত্র-প্রদর্শনী করে-ছিলেন তাতে একটা ঘর ভরে গিয়েছিল। তার পরে তো আরও অনেক তোলা হয়েছে। আমাদের ছেলেবেলায় তাঁর যে চেহারা মনে পড়ে তাতে তাঁর লম্বা লম্বা কোঁকড়া চুল দেখা যায়। রাবীন্দ্রিক যুগে অনেক যুবক আবার এই কায়দা অনুকরণ করতেন। যদিও তাঁরা বোধ হয় ভুলে যেতেন যে, লম্বা চুল রাখলেই রবীন্দ্রনাথ হওয়া যায় না। যেমন আমার এক ভাইপোকে ম্যাট্রিকের পড়া মন দিয়ে করে নি বলে বকাবকি করাতে সে কৈফিয়ত স্বরূপ বলেছিল রবীন্দ্রনাথও ম্যাট্রিক পাস করেন নি। তার উত্তরে আমি বলেছিলুম, ‘হ্যাঁ, রবীন্দ্রনাথ ম্যাট্রিক পাস করেন নি বটে কিন্তু ম্যাট্রিক পাস না করলেই রবীন্দ্রনাথ হওয়া যায় না।’ এরই সমতুল্য একটি ক্ষুদ্র স্থিতি উল্লেখ করবার লোভ সংবরণ করতে পারলুম না। সেটি এই যে, শুনেছি আমার সেজভাণ্ডার কুমুদনাথ চৌধুরীকে কে-একজন বলেছিল যে কার্লাইল পড়ে ইংরিজী শেখা যায় না। তদুত্তরে তিনি নাকি বলেছিলেন, ‘হ্যাঁ, কার্লাইল পড়ে ইংরিজী শেখা যায় না, ইংরিজী শিখে কার্লাইল পড়তে হয়।’ যাই হোক, পরবর্তীকালে রবিকাকা এই দীর্ঘ কুঞ্চিত কেশ কর্তন করেছিলেন। আমার নিজের ধারণা এই যে, অল্পবয়স অপেক্ষা অধিকবয়সে তাঁর চেহারা আরও ভালো হয়েছিল। দীর্ঘকেশ-দীর্ঘশ্রুতে তাঁকে ঋষিতুল্য মনে হত। ভাইদের মধ্যে যদিও তাঁর রঙ খুব সাফ ছিল না, এমনকি আমার বড়পিসিমা

(সোদামিনী দেবী) তাঁকে কালো বলতেন, গুনেছি; কিন্তু তাঁর স্বকের বেশ একটি মম্মণ লালিত্য ও সুন্দর জেল্লা ছিল। অল্পবয়সে ডন ফেলার ব্যায়াম অভ্যাস করতেন বলে গুনেছি। সেকালে কৃষ্টি প্রভৃতি শরীরচর্চার রেওয়াজ জোড়াসাঁকোর বাড়িতে ছিল। আবার, এমন গুরুভোজনও ছিল না যাতে শরীর কেবল মেদবহুল হয়ে যায়। খাবার নিয়ে রবিকাকা নানারকম পরীক্ষাও চালাতেন, সেটা অনেকেই জানেন। যথা, কুটিতে রেড়ীর তেলের ময়ান দেওয়া, যাতে একাধারে আহার ও ওষুধ হয়। বিশেষ বিশেষ চিকিৎসা-পদ্ধতির প্রতি দৃঢ় বিশ্বাসও তাঁর ছিল। যথা, হোমিয়োপ্যাথি এবং বায়োকেমি। নিজেকে অনেককে ওষুধ দিতেন এবং তাতে উপকার হয়েছে গুনলে খুব খুশি হতেন। কাকিমার শেষ অস্থখে এক হোমিয়োপ্যাথি ধরে রইলেন ও কোনো চিকিৎসা বদল করলেন না বলে কোনো কোনো বিশিষ্ট বন্ধুকে আক্ষেপ করতে গুনেছি। সেবাগুণও যে তাঁর খুব ছিল, তা তাঁর জীবনে ও চিঠিপত্রে প্রকাশ পেয়েছে।

তাঁর অন্তরঙ্গ বন্ধুদের মধ্যে ছিলেন প্রিয়নাথ সেন। তাঁকে ও অন্ত্র কোনো কোনো বন্ধুকে নিজের বিয়েতে নিমন্ত্রণকর্তারূপে নিজের নামেই নিমন্ত্রণপত্র পাঠিয়েছিলেন। আর-একজন তাঁর কাছে খুব আসতেন, তাঁর নাম প্রবোধচন্দ্র ঘোষ।

রবিকাকার আর-একজন বিশিষ্ট বন্ধু ছিলেন শ্রীশচন্দ্র মজুমদার, ডেপুটি ম্যাজিস্ট্রেট। তাঁকে লিখিত কবিতার পত্রটি এই প্রসঙ্গে অনেকের মনে আসতে পারে। তাঁর চেহারা আমার অল্প অল্প মনে পড়ে। তাঁর সম্বন্ধে আর-একটি উল্লেখযোগ্য ঘটনা এই যে, তাঁর স্ত্রীর নাকি অসাধারণ ক্ষমতা ছিল— তিনি চোখ বুজে থাকলেও তাঁর চোখের উপর বই রেখে দিলে তা তিনি পড়তে পারতেন। মীরারা শেষ পর্যন্ত তাঁকে জ্যাঠাইমা বলে খুব শ্রদ্ধাভক্তি করত। এখনো তাঁর বংশধরদের সঙ্গে আলাপপরিচয় রাখেন। তাঁর বড়ছেলে সম্ভাষকে রবিকাকা রথীর সঙ্গে আমেরিকায় কৃষিবিজ্ঞান শেখবার জন্তে পাঠান, সে কথা অনেকেই জানেন। তাঁরা ফিরে এসে শিলাইদহের জমিদারিতে তাঁদের কৃষিবিদ্যার কিছু পরিচয় দেবার সুযোগ পেয়েছিলেন। আমার মনে হয়, রথীর যে বাগান করবার শখ পরবর্তী জীবনে দেখা দেয় সেটি এই বিজ্ঞানচর্চারই আর-এক দিক। এখানেই তাঁর বৈজ্ঞানিক বিদ্যাশিক্ষার সঙ্গে বংশের ধারাবাহিক শিল্পপ্রবণতার শুভসম্মিলন ঘটেছিল। আমি অনেক সময় বলি যে, বাইবেলে যে বলে, সৃষ্টির প্রথম দিনে

ভগবান বললেন let there be light আর অমনি আলো হল, আমাদের মত মর্তমানবের পক্ষে অনেক মুখের কথায় কিছু করা সম্ভব হয় না। ইচ্ছামত ফল ফলাতে গেলে তার জন্তে অনেক কাঠখড় পোড়াতে হয়। রবিকাকারও খুব বাগানের শখ ছিল। কিন্তু তফাতের মধ্যে তিনি হাতে-কলমে সে শখ মেটাতে কোনোদিন চেষ্টা করেন নি। কেবল কবিজনোচিত ভাবে ফুলফলের সৌন্দর্য উপভোগ করেছেন। শুনেছি তাঁর 'শান্তিপূর্বে' কোণার্ক বাড়িতে যখন ছিলেন তখন তাঁর বারান্দায় বসলে হাতের কাছে প্রকাণ্ড মোটা শিমুলগাছ এবং কিছু দূরের রোগা ঢ্যাঙা পলাশ গাছে যখন বসন্তকালে লাল ফুল দেখা দিত, তখন রবিকাকা যে আনন্দ লাভ করতেন, তা মাহুষের পুত্রলাভেও হয় না। তবে এও শুনেছি যে, তাঁর সর্বতোমুখী ক্ষমতার বাস্তব দিক থেকেও ছাত্রদের তিনি চিঠিপত্রে বাগান তৈরি সম্বন্ধে বিস্তারিত উপদেশ দিতে ক্রটি করেন নি। তাঁর গানে ও কবিতায় সর্বত্র যেমন যন্ত্রের মধ্যে বীণা ও বাঁশি, তেমনি ফুলের মধ্যে চাঁপা ও বেলফুলের অনেক উল্লেখ পাওয়া যায়। শুধু তাই নয়, বর্ষাঋতুর কেয়া আর রজনীগন্ধা ও শরতের শিউলি যে তাঁর গানে-কবিতায় কত আছে, পাঠকমাত্রেই জানেন।

জোড়াসাঁকোর বাড়িতে আমরা বেশি থাকতুম না। চৌরঙ্গী অঞ্চলেই ভিন্ন ভিন্ন বাড়ি ভাড়া করে থাকতুম। কারণ, পূর্বেই বলেছি, মা সেট জেভিয়ার্স ও লরেটো স্কুলেই আমাদের ভর্তি করেছিলেন। তবে এই দুই বাড়ির মধ্যে দেখাশোনা আনাগোনা যথেষ্ট ছিল। সন্ধ্যাবেলা আমাদের বাড়িতে আত্মীয়বন্ধুর খুব আড্ডা জমত এবং 'প্রমারা' নামে একটি পয়সার খেলা হত। রবিকাকাও সপরিবারে প্রায়ই আসতেন। রথীর আত্মকথায় তার উল্লেখ আছে। কিন্তু তিনি সে খেলায় যোগদান করতেন না। যতদূর মনে পড়ে, রবিকাকাকে কোনো সাধারণ খেলায় কখনো যোগ দিতে দেখি নি। তবে এরকম খেলায় যোগ না দিলেও তাঁর স্বাভাবিক উদ্ভাবনীশক্তি আমাদের সঙ্গেও নতুন নতুন খেলায় প্রকাশ পেত। যথা, পাঁচ জনে একত্র বসে মুখে মুখে পালাক্রমে গল্প রচনা করা। 'মেরি সার্কেল' বলে একটা ইংরিজী বই দিয়েছিলেন, তাতেও নানারকম ঘরে-বসে খেলার বর্ণনা ছিল।

হেঁয়ালি নাট্যতে পরে যা বিস্তৃতভাবে লিখেছিলেন সংক্ষেপে ও ঘরাওভাবে তা খেলাচ্ছলে অভিনয় করা হত। অর্থাৎ, একটা কথাকে ভাগ করে প্রত্যেক

ভাগের অভিনয় দেখিয়ে সমস্ত কথাটা দর্শকদের অহুমান করতে বলা হত— ‘শারাড্’। এরই একটি ভিন্নরূপ হয়েছে মূকনাট্য বা ডাঙ্ শারাড্— অর্থাৎ কেবল অঙ্গভঙ্গি দ্বারা কথটি বোঝানো। যথা, দু হাত দিয়ে দু কান চেপে ধরলে, তার মানে হল ‘চাপকান’। এই খেলার এত চল একসময়ে আমাদের মধ্যে হয়েছিল যে, ক্রমাগত পাগলের মত নানা প্রকার অঙ্গভঙ্গি করতে করতে সাধারণ সামাজিক বাক্যালাপ একরকম উঠে যাবার উপক্রম হয়েছিল। কাজেই এ খেলা বন্ধ করা শ্রেয় মনে হল।

কোনো কোনো সময় একত্র বাসও করে গেছেন। যথা, দেশের মধ্যে কারোয়ার, সোলাপুর, সিমলা পাহাড় ইত্যাদি এবং বাড়ির মধ্যে ভবানীপুরের বাড়ি, পার্ক স্ট্রিটের বাড়ি ইত্যাদি। নাট্য ও গানের স্মৃতিতে এ কথার আগেই উল্লেখ করেছি। জ্যোতিকাকামশায়ের ‘সরোজিনী’ জাহাজে আমাদের একত্র ভ্রমণের কথাও আগেই লিখেছি।

ছোটবেলায় রবিকাকার সঙ্গে অনেক সভাসমিতিতে ও লোকের বাড়িতে ঘুরে বেড়াতুম। তার মধ্যে একবার বন্ধিমবাবুর গুথানে গিয়েছিলুম; তাঁর সেই খাঁড়ার মত নাক ও পাতলা চোঁট এখনও একটু একটু মনে পড়ে।

বিহারীলাল চক্রবর্তীর প্রতি কবি বলে নতুন কাকিমার এত ভক্তি ছিল যে, তিনি নিজের হাতে তাঁর জন্তে একটি পশমের আসন বুনে দিয়েছিলেন। সেজন্তু রবিকাকা একটু ঈর্ষা বোধ করতেন, নিজেই লিখেছেন। সেই বিহারীলাল চক্রবর্তীর ছেলে অবিনাশ যখন-তখন জোড়াসাঁকোর বাড়ির ভিতর পর্যন্ত আসতেন এবং ‘মেজকাকিমা’ ‘মেজকাকিমা’ বলে উচ্চৈঃস্বরে মাকে ডাকতেন— বেশ মনে পড়ে। বোধ হয় কবিবংশের একটু ছিট তাঁরও ছিল। বাল্মীকি-প্রতিভার কতকগুলি গানে বিহারীলালের প্রভাব পড়েছে সে কথা রবিকাকা নিজেই স্বীকার করেছেন। পরে অবশ্য এই কবিবংশের সঙ্গে রবিকাকা ঘনিষ্ঠ কুটুম্বিতা-স্বত্রে আবদ্ধ হন। কিন্তু সে অনেক পরের কথা।

মানময়ী-প্রসঙ্গ

“একদিন জ্যোতিবাবুরা কয়েকজন বন্ধুবান্ধব সহ টীমারে চন্দননগর যাইতেছিলেন। পথে অকস্মাৎ বড় জল তুফান আরম্ভ হইয়া সমস্ত টীমারথানিকে আলোলিত করিয়া তুলিয়াছিল। ইহাদের কিন্তু সেদিকে আশঙ্কাপণ ছিল না। জ্যোতিবাবু স্বয়ং-রচনা করিতেছিলেন ও অক্ষয়বাবু [চৌধুরী] তাহার সঙ্গে একটির পর একটি গান বাঁধিয়া যাইতেছিলেন।...এই একদিনকার রচিত গানগুলি হইতেই, পরে মানভঙ্গ [মানময়ী] নামে একখানি গীতিনাট্য প্রস্তুত হইয়াছিল। মানভঙ্গ প্রথমে জোড়াসাঁকোর বাড়ীতে অভিনীত হয়।”

—বসন্তকুমার চট্টোপাধ্যায়, ‘জ্যোতিরিন্দ্রনাথের জীবনস্মৃতি’, পৃ ১৫৭

“জ্যোতিরিন্দ্রনাথের স্মৃতিকথায়...তিনি শুধু অক্ষয়চন্দ্রের নাম করিয়াছেন, মানময়ীতে কিন্তু রবীন্দ্রনাথেরও গান রহিয়াছে; যেমন শেষ গান— ‘আয় তবে সহচরি হাতে হাতে ধরি ধরি’ ইত্যাদি।” —রবীন্দ্র-রচনাপঞ্জী, শনিবারের চিঠি, পৌষ ১৩৪৬

“মানময়ীর গানগুলি রবীন্দ্রনাথকে পড়িয়া শুনাইয়াছিলাম, তিনি ইহার মধ্যে মাত্র আর দুইটি গান নিজের বলিয়া সন্দেহ প্রকাশ করিয়াছেন।...

১। রতির গান। ছিলে কোথা বল...

২। বসন্তের গান। চল চল, চল চল, চল ফুলধনু...”

—রবীন্দ্র-রচনাপঞ্জী, শনিবারের চিঠি, ফাল্গুন ১৩৪৬

উল্লিখিত ব্যক্তিদের সংক্ষিপ্ত পরিচয়

অপু। আশুতোষ চৌধুরীর ভ্রাতা ডাক্তার স্নহুৎনাথ চৌধুরীর কন্যা
অভি। হেমেন্দ্রনাথের কন্যা অভিজ্ঞা দেবী
অমলা দাস। দেশবন্ধু চিত্তরঞ্জনের ভগিনী, বিখ্যাত গায়িকা
অরুণদাদা। দ্বিজেন্দ্রনাথের পুত্র অরুণেন্দ্রনাথ
উষাদিদি। দ্বিজেন্দ্রনাথের কন্যা
জগদীশদাদা। সম্পর্কে রবীন্দ্রনাথের মাতুল
জ্যোৎস্নাদা। জানকীনাথ ঘোষাল ও স্বর্ণকুমারী দেবীর পুত্র
দ্বিপুদাদা। দ্বিজেন্দ্রনাথের জ্যেষ্ঠপুত্র দ্বিপেন্দ্রনাথ
নগেন্দ্র। রবীন্দ্রনাথের জামাতা নগেন্দ্রনাথ গঙ্গোপাধ্যায়
নতুন কাকিমা। জ্যোতিরিন্দ্রনাথ ঠাকুরের পত্নী
নিখিল। আশুতোষ চৌধুরীর ভ্রাতা মনমথনাথ চৌধুরীর পুত্র
প্রতিভাদিদি। হেমেন্দ্রনাথের কন্যা, আশুতোষ চৌধুরীর পত্নী
প্রবোধচন্দ্র ঘোষ। রবীন্দ্রনাথের ‘কবিকাহিনী’ (১৮৭৮) প্রকাশ করেন
বড়ঠাকুর। আশুতোষ চৌধুরী
বর্ণপিসিমা। মহর্ষির কন্যা বর্ণকুমারী
মঞ্জু। সুরেন্দ্রনাথ ঠাকুরের কন্যা
মণ্টু। শ্রীদিলীপকুমার রায়
রমা। স্নহীন্দ্রনাথ ঠাকুরের কন্যা
সত্যদাদা। মহর্ষির দৌহিত্র সত্যপ্রসাদ গঙ্গোপাধ্যায়
সরলাদি। সরলা দেবী
সুচিত্রা [মিত্র]। সংগীতভবনের প্রাক্তন ছাত্রী
সুপ্রভাদিদি। মহর্ষির দৌহিত্রী ; শরৎকুমারীর কন্যা
সুশীলাদি। মহর্ষির দৌহিত্রী . শরৎকুমারীর কন্যা
সুরেন। সুরেন্দ্রনাথ ঠাকুর
হিরণদিদি। জানকীনাথ ও স্বর্ণকুমারীর জ্যেষ্ঠা কন্যা

